

MGA HEBREOHANON,

KAPITULO SAIS ³

✉ Maayong buntag, mga higala. Usa kini ka pribilihiyo nga maania dinhi. Ug—ug para matuman ang maanindot nga pasiuna sa atong pastor gikinahanglan gayud ang tinuod nga pagkinabuhi, dili ba? Busa ginadayeg nato ang Ginoo sa tanan Niyang dakung gahum sa pagpang-ayo ug sa Iyang mga kalooy nga Iyang gihatag kanato sa mga nangaging katuigan.

Karon aduna ako’y pipila ka mga pahibalo nga pagahimoon. Una, kami, nila Igsoong Wood ug Igsoong Roberson, gusto namong pasalamatan kamong tanan tungod sa pag-ampo n’yo para sa amoa, para sa hilwas nga pagbiyahe. Nagkaaduna kami og maanindot gyud nga higayon; mibiyahe kami sulod sa upat ka adlaw ug tunga, sa hunahuna ko, ug hilwas pud kami nga nakabalik. Gipanalanginan gayud kami sa Ginoo.

⁵⁰⁶ Karon, ginapahibalo nato nga si Igsoong Graham Snelling, ang iyang rebaybal, nagapadayon gihapon, dinha sa—sa may tumoy sa Brigham Avenue, sa . . . dinhi sa lungsod. Ug sa niining moabot nga Miyerkules sa gabii . . . buut ko nga mogikan ugma, human sa usa ka panerbisyo sa paglubong nga akong ipahibalo sa pipila ka gutlo. Ipahibalo ra namo kaninyo sa Miyerkules sa gabii. Gusto man gud namong moadto ingon nga usa ka grupo, kitang tanan, aron duawon si Igsoong Graham sa dili pa niya tapuson ang iyang buluhaton didto. Ug atong paningkamotan nga madala ang tibuok simbahan, kung mahimo, ug motabong ingon nga usa ka grupo aron himamaton, og ubanan pud si Igsoong Graham sa usa sa iyang mga buluhaton.

⁵⁰⁷ Ug, bueno, unyang hapon sa—sa punerarya sa Charlestown, atua si—si Mrs. Colvin, nga kanhing nagatabong dinhi sa simbahan daghan nang mga tuig ang milabay, setenta’y-kuwatro anyos, og kagahapon mibiya na siya niining kinabuhia aron makauban na si Ginoong Jesus. Ug sa Lunes sa iyang paglubong magawali, si Reverend Mr. McKinney, nga, kanhing, pastor sa iglesiang Methodist sa—sa Port Fulton sulod sa daghang mga katuigan, og nga suod pud nila nga higala. Ug tabangan nako siya, sa Lunes, sa, sa hunahuna ko sa ala una-traynta, didto sa—sa kapelya sa Charlestown, Indiana. Ug sa tanang mga higala sa pamilyang Colvin sigurado gyud, kabalo ko, nga ikalipay ninyo karon ang diyutay’ng pagdasig o ang . . . diyutay’ng pagpakiglamano. Kay nasayod man kitang tanan kung unsa kana, kita nga mga miagi na niana, nga mga walog, mismo, ug nasayod kung unsa ang masinati nga mawad-an og

usa ka higala. Ug busa atong... Nakahaya siya karon didto sa—didto sa kapelya, sa Charlestown, Indiana. Kung makaadto kamo unyang hapon, aba, ikalipay gayud sa pamilyang Colvin, sigurado ko. Daghan sa ilang mga paryente ang nagatambong gihapon dinhi sa tabernakulo. Ngani ako man ang nagkasal, naglubong, nagbautismo, halos, sa ilang tibukok, pamilya. Ug si Mr. Grayson sàb, nga silingan nato dinhi kaniadto, mao ang embalsamador didto.

⁵⁰⁸ Ug dayon, unyang gabii, kon itugot sa Ginoo, kon diin kita mohunong karong buntaga, paningkamotan natong ipadayon kini unyang gabii, sa niining dakung pagtuon nga atong ginatunan karon. Ug sa hunahuna ko mao ra kana ang mga pahibalo, kutob sa—sa akong—akong nahibaloan. Ug sa niining moabot nga Miyerkules sa gabii, diay, among ipahibalo kon kanus-a nga gabii kita moadto aron ubanan si Igsoong Graham.

⁵⁰⁹ Ug ginaabi-abi gyud namo ang tanang mga bag-ohan sa among mga pultahan. Ug malipayon kami nga makauban kamo dinhi niining buntaga, ug ginaampo namo nga ang Dios sa labing, madagayaon gayud, magapanalangin kaninyo sa niini nga panagtigum karon.

⁵¹⁰ Gisultihan diay ako ni Igsoong Cox nga ang mga himan para pangpakusog sa tingog dili kono maayo ang pag-andar niining orasa. Tingali'g, tungod kana sa klima, og nabasa ang mga ispeker dinha. Ug dili na baya ingon ka okey ang mga niini, sa sugod pa lang, busa tingali'g mao pud kana ang hinungdan.

⁵¹¹ Nakita ko ang usa ka igsoong babaye nga akong kaila nga nagalingkod dinhi, si Igsoong Arganbright, ako... Dili kini angay ug—ug husto, nga ipangutana kini, pero aduna ka na ba'y balita gikan kang Igsoong lalaking Arganbright sukad niadtong milakaw siya? Interesado gayud akong makabalita nga gikan kaniya sa gilayon. Atua siya karon sa Switzerland ug Germany, sa usa ka panagtigum didto kauban sila Igsoong Tommy Hicks ug Paul Cain. Kung aduna ka na'y balita, Igsoong Ruth, ipahibalo ra sa ako dayon, kon mahimo mo.

⁵¹² Karon, dinhi sa gamay'ng tabernakulo wala kita'y pagpamiyembro, pero aduna kita'y pagpakig-fellowship. Wala kita'y kredo kondili si Cristo, walay balaod kondili gugma, walay libro kondili ang Biblia. Mao lang kana ang bugtong Libro nga nahibaloan nato, ug ang bugtong butang nga nahibaloan nato, nga aduna kita. Samtang ang Dugo ni Jesus Cristo nagalimpyo kanato gikan sa tanang mga sala, aduna kita'y pagpakig-fellowship sa usa'g usa, sa tanan.

⁵¹³ Namatikdan ko, karong buntaga, may pipila kaninyo siguro ang nakadungog sa igsoong lalaki nga nagaampo. Usa siya ka Katoliko, diay, o usa ka Katoliko kaniadto. Ug aduna ma'y nagkalainlaing matang sa mga tawo nga nagatambong dinhi. Ngani nagkaaduna ako og pribilihiyo, kaganina, nga

malamano ang usa ka igsoong Mennonite nga ania karon. Ug dunay mga gikan sa Mennonite, sa Methodist, sa Baptist, ug sa Katoliko, o bisan kinsa man ang may tinguha, patambonga sila. Ug nagapakig-fellowship man kita sa mga panalangin sa Pulong sa Dios. Ania pu'y nagalingkod nga Jehovah Witness ug nagkalainlaing matang sa mga tawo, nga, gikan sa nagkalainlaing mga denominasyon.

⁵¹⁴ Gusto gyud nako kaniadto (bueno, hangtud man karon) ang Kasadpan. Ganahan pud ko og mga kabayo ug mga baka. Midaku man gud ko sa umahan, ug ako—gusto ko gayud kadto. Ug pagtapokon namo ang mga baka kaniadto, nagauban-uban ko sa ilaha. Ug aduna kami'y pangtapok nga koral. Wala ko kabalo kon kamong mga taga-Sidlakan nasayod ba kung unsa ang pangtapok nga koral para sa mga baka, o wala. Pag ginadala ang mga baka ngadto sa—sa sibsibanan, adunay koral para dili sila mangtipas, sama sa ginaingon nila, og para mamalik ra sila sa ransohan. Didto mangsabsab sila og mga sagbot, kon diin ginapatubo ang mga sagbot para sa pagkaon nila inig tingtugnaw. Ug didto pud sa bukid, aduna usab og koral, kon diin ilang ginabulag ang daghang mga bayeng-baka ug mga laking-baka, ug uban pa. Pangtapok nga koral para sa mga baka ang tawag niadto. Pero didto sa pinakadakung koral nagapuwesto ang rantsero pag nagasulod na ang mga baka.

⁵¹⁵ Ug bueno milingkod ako didto, sa makadaghan nang higayon, sa monturahan, ug ginatan-aw ko ang mga baka samtang nagasulod sila. Nagkalainlain ang mga patik sa mga baka nga nagasulod didto. Adunay uban nga gipatikan og “Diamond.” Ug ang uban sa ilaha “Bar X.” Ug sa uban pud. . . Ang sa amoa “Tripod,” nga mora'g sama sa simbolo sa Boy Scout. Ang sunod, sa may luyo, mao'y “Turkey Track,” nga nakapatik sa kabayo. Ug nagkalainlain ang ilang mga patik, para—para mailhan nila ang ilang baka sa dihang ginapagawas nila ang mga niini.

⁵¹⁶ Bueno, dili kaayo interesado ang rantsero kung unsa ang patik sa mga baka, pero ania kung unsay, interesado ang rantsero nga tan-awon maoy timailhan sa ilang dalunggan. Ang tanan nga nagasulod didto, bisan unsa pa ang patik niadto, gikinahanglan nga puro gyud nga kaliwat og Hereford. Dili makasulod ang baka didto gawas kon usa kadto ka Hereford. Gikinahanglan sàb nga rehistrado ang baka kay kon dili nan dili pud kadto makasulod.

⁵¹⁷ Nahunahuna pud nako, nianang adlawa pagmoabot na ang Ginoo, dili Niya panumbaligon kung unsa man ang atong patik, kondili kung kitang tanan ba mga Cristohanon nga natawo na pag-usab. Husto kana. Mao kana ang kaliwat ni Cristo. Pagapamatud-an kita pinaagi sa pagsusi sa Dugo, kon kita bang tanan nga Cristohanon. Ug kung mamaingon niana kita *didto*, nan kinahanglan nga magmaingon niana sàb kita dinhi.

Dili ba? Mao kana nga, ginakalipay nato ang tanang pagpakig-fellowship gikan sa tanang nagkalainlaing mga iglesia.

518 Karon ginatun-an nato kining mapanalanginog Basahon sa Mga Hebreohanon. Usa ka igsoong lalaki ang nalipay gyud og ayo tungod niini mao nga mikuha siya og mga teyp ug nagahimo siya karon og usa ka libro sa mga pagpanudlo mahitungod niini.

519 Bueno paingon na kita, sa dili madugay, sa ika-11 nga kapitulo. Nagalaum kita nga igahin ang panahon sa tingtugnaw para nianang, mahitungod sa ika-11 nga kapitulo. Kay bahin sa matag usa niadto nga mga tawo, gusto natong balikan ang Basahon ug itakdo ang tibuok Kasulatan. Buhaton ko kana. Bahinon ko, ang pipila niini, niining nauna nga mga kapitulo, aron maitakdo ang tibuok Basahon. Tungod, nakita n'yo, kinahanglan man gud nga pamatud-an sa Kasulatan ang Kasulatan.

520 Busa, kung aduna ma'y unsa man nga panagsumpaki, nga ginahunahuna ni kinsa man nga ang mga Kasulatan kono nagasumpaki sa usa'g usa, sayup kana. Wala gayu'y Kasulatan nga nagasumpaki sa usa ka Kasulatan. Ang—ang panagsumpaki dinha tingali kon diin ginasumpaki Niini ang atong paagi sa pagtan-aw Niini, apan dili gyud Niini ginasumpaki ang Kaugalingon Niini. Ngani dugay na ako sa ministerio, bayntesais na ka tuig karon, ug wala pa gyud ko sukad, ni usa ka higayon, nakakaplag og usa ka butang sa Biblia nga nagasumpaki sa uban pa nga nahisulat sa Biblia. Ug ako—kabalo man ko nga wala gayud.

521 Ug karon pagatun-an nato ang usa sa mga pinaka mapanalanginon nga kapitulo sa Mga Hebreohanon, ang ika-7 nga kapitulo. Ug kon dunay si kinsa man nga walay Biblia, og gustong magsunod kanato sa mga pagbasa, malipay kami nga dalhan kamo og Biblia kung ipataas lang ninyo ang inyong kamot. Paanhion ko lang ang pipila sa mga anciano, o si kinsa man, para mokuha og pipila dinhi. Aduna na'y nagpataas sa ilang mga kamot dinha sa luyo. Ug salamat, igsoon. Ug kung gusto n'yo og Biblia, ipataas lang ang inyong kamot, ug ila ra kining dalhon sa inyo.

522 Bueno, ang bugtong paagi aron maitukod ang usa ka iglesia, ang bugtong paagi aron ang usa ka tawo makabaton og Pagtoo, dili man pinaagi sa iyang denominasyon, dili pud pinaagi sa iyang pagpamiembro. Ug ang iyang Pagtoo dili sàb nakabasi sa teolohiya nga mga ideya nga iya sa tawo, tungod kay, kung ingon-ana, bug-os gyud kana nga iya ra sa tawo. Apan ang bugtong paagi nga makakaplag ang Pagtoo og tinuod nga dapit nga pahulayanan niini, mao'y diha ibabaw sa dili-matarug ug walay-pagkausab nga Pulong sa Dios. “Ang pagtoo nagaabot pinaagi sa pagpatalinghug, sa pagpatalinghug sa Pulong.” Mao kana ang gikinahanglan. Ug—ug ang Pagtoo

pag napatalinghugan na ug gidawat na, nan napahiluna na gyud kini hangtud sa kahangturan. Wala na'y makatarug pa niini, bisan unsa pa'y mahitabo. Wala na'y makapausab pa niana nga Pagtoo. Palandunga n'yo kana. Nakaangkla na kamo, ug dili na gyud mausab, ilalum sa panahon ug Eternidad. Nakaangkla na kamo hangtud sa kahangturan, "Kay ang Dios, pinaagi sa usa ka halad, gihingpit na hangtud sa kahangturan ang mga gibalaan, o gitawag."

⁵²³ Ug ang Pagtoo aduna gyu'y dakung bahin sa Cristohanon, sa kinabuhi sa magtotoo, nga makabarug kini bisan sa kilid sa usa ka lapokon nga lubnganan o lungon, kon diin ang usa ka bililhon nga bata o usa ka hinigugma miagi na gikan niining kinabuhia ngadto sa pikas bahin. Ug ingon nga may maisogon nga pagtutok nga iya sa mata sa agila, og motan-aw nganha Kaniya nga miingon, "Ako mao ang Pagkabanhaw ug ang Kinabuhi." Ug ginakalimtan na nila ang mga butang nga nangagi na. Nagapadayon sila ngadto sa langitnong pagtawag.

⁵²⁴ Malipayon kaayo ko nga nagtagana ang Dios og ingon-niana, ug gihimo kining usa ka gasa nga walay-bayad para sa tanan. Ingon niana unta ang mga iglesia. *Ang mga iglesia* dili man nagapasabot og mga denominasyon o mga organisasyon; ang buut ipasabot niini, "Mga grupo sa mga tawo, sa mga magtotoo, nga nanagkatigum ilalum sa pagpakig-fellowship diha sa Pulong."

⁵²⁵ Ug sa niining maanindot nga pagtudlo dinhi ni San Pablo, sa mga basihanang nga nahisgotan, diha sa naunang mga kapitulo, tinuyo niyang gihisgotan ang labing-hataas nga pagka-Dios ni Ginoong Jesus ug kung Kinsa Siya. Si Cristo mao ang Dios, nga gihimong ingon-niadto aron mabati Siya ug mahikap Siya sa mga tawo, ug—ug makapag-fellowship Kaniya. Si Cristo, ang Ginoong Jesus, mao ang lawas nga gipuy-an sa Dios, "Ang Dios nahimong unod ug nagpuyo ipon kanato." Unang Timoteo 3:16, "Dili malalis nga daku ang tinago sa pagkadiosnon, kay ang Dios nadayag diha sa unod."

⁵²⁶ Mikanaug ang gamhanang Jehovah ug nahimong mahikap, pinaagi sa pagpuyo sa lawas sa Kaugalingon Niyang Anak, nga nagapahayag ug nagapasig-uli sa kalibutan ngadto sa Iyang Kaugalingon. Ang Dios dili . . . si Cristo dili man ubos kaysa sa Dios, ug—ug ang Dios dili pud ubos kaysa kang Cristo. Ngani ang duha magkauban nga nagporma sa pagkalawas sa pagka-Dios, gihimong ubos diyutay kaysa mga Anghel, aron mahimo Siya nga mag-antus. Tungod dili man mahimong mag-antus ang mga Anghel. Si Jesus mao ang Tabernakulo nga gipuy-an sa Dios.

⁵²⁷ Miingon ang Biblia, sa ika-7 nga kapitulo sa Mga Buhat sa mga Apostoles, nga, "Ang mga tabernakulo, ug sinunog- . . . ang halad ug mga halad-nga-sinunog wala Mo pagdawata, kondili giandaman Mo Ako og usa ka lawas. Bisan pa niana ang

Labing Hataas wala magapuyo sa mga balay nga binuhat sa mga kamot, kondili giandaman Mo Ako og usa ka lawas,” nga mao’y gibalayan o gipuy-an aron sa pagpakigkauban sa tawo.

⁵²⁸ Kon itugot sa Dios, sa dihadhi nga mahuman na kita dinhi niini nga kapitulo, o mahuman na niini nga Basahon, buut natong balikan ug hisgotan ang Basahon ni Ruth ug ipakita dinha kung sa unsang paagi nga nahimong atong kabanay ang Dios, nga ginapasig-uli ang mga nahisalaag pabalik ngadto Kaniya mismo pinaagi sa pagpakigkauban ug nahimong usa sa ato. Ang Manunubos gikinahanglan man gud nga mahimong usa ka kabanay, ug ang bugtong paagi nga mahimong atong kabanay ang Dios, mao man ang mahimong usa sa ato. Tungod, dili man Siya puede nga mahimong usa ka Anghel ug mahimong kabanay sa tawo.

⁵²⁹ Kagabii sa dihang nakaistorya ko ang naguol nga batan-ong lalaki, nga akong kauban, tungod sa iyang inahan nga bag-ohay lang namatay, ingon niya, “Oh, Igsoong Bill, siguro usa na siya ka Anghel karong gabhiona.”

⁵³⁰ Ingon ko, “Dili, Earl. Dili gyud siya mamahimong Anghel. Siya’y usa gihapon ka babaye, karong gabhiona, sama lang sa pagbuhat sa Dios sa iyaha, ug ingon na niana sa kanunay, og dili gayud mamahimong usa ka Anghel.” Nagbuhat man ang Dios og mga Anghel. Wala Niya gibuhat ang mga tawo para mahimong mga Anghel. Tungod nagbuhat man Siya og mga Anghel *ug* mga tawo. Busa ang mga tawo dili gyud mamahimong mga Anghel, ug ang mga Anghel sàb dili gyud mamahimong mga tawo. Lahi man ang pagkabuhat kanila sa Dios.

⁵³¹ Karon, ug si Cristo ingon nga nahimong unod aron tuboson ang tawo gikan nianang kahimtang kon diin kini nahulog, ug ang walay-kamatayon kinahanglan mokanaug tungod sa sala, mikanaug ang Dios ug gigamit ang porma og hitsura nga tawo, ug nahimong atong kabanay, aron Siya ang magpas-an sa atong mga sala ug sa atong kamatayon.

⁵³² Ug sa usa sa mga gihulagway nato, sa nahaunang mga leksyon, diyutay lang nga paghulagway aron makasabot sàb ang mga bag-ohan. Ang Dios, sa Iyang pagpaingon sa Kalbaryo kaniadto, samtang atua na Kaniya ang ikot sa kamatayon, ug nagahagyong na sa palibot Niya, ug sa katapusan gipaak Siya niini hangtud nga namatay Siya. Namatay Siya hangtud nga ang adlaw mihunong sa pagsidlak. Namatay Siya hangtud nga ang bulan ug ang mga bitoon wala na mihatag sa ilang kahayag.

⁵³³ Hinoon, gikinahanglan Niyang buhaton kadto, aron mailubong gyud ang ikot sa kamatayon! Kay kung nahimo ra Siyang usa ka tawong walay-kamatayon, kung anaa ra Siya sa pagka Theophany, o kaha sa Espiritu, nan wala gyu’y pagkontrolar ang kamatayon. Mao nga gikinahanglan Niya nga mahimong unod, aron Iyang madawat ang ikot sa kamatayon.

Pero kon ang usa ka buyog o usa ka insekto nga nagapamaak, pag nakapamaak na kini og halawom kausa, dili na gayud kini makapamaak pag-usab. Tungod nabilin na man diha sa unod ang ikot niini. Ug mao kadto nga si Cristo nahi- . . . o ang Dios nahimong ingon niadto. Mipuyo sa unod si Cristo, aron Iyang mapataup sa Mismo Niyang unod ang ikot sa kamatayon. Ug sa dihang mihawa na ang kamatayon gikan Kaniya didto sa krus, nabilin ang ikot niini, mao nga dili na kini makapamaak pa sa usa ka magtotoo. Mahimo kining mohagonghong, mahimo kining mohagyong-hagyong ug manghulga, apan dili na kini makapamaak pa. Wala na man kini'y ikot.

⁵³⁴ Ang halangdong si San Pablo, sa iyang paglakaw kaniadto paingon sa kamatayon, misinggit siya ug miingon, “Oh kamatayon, hain na ang imong ikot? Ug lubnganan, hain na ang imong pagdaug? Apan salamat sa Dios Nga naghatag kanato og pagdaug pinaagi sa atong Ginoong Jesus Cristo, kay ang kamatayon ug lubnganan nawad-an na man og gahum.”

⁵³⁵ Bueno, niadtong, miaging Domingo nahisgotan nato ang, “Pagbiya sa nahaunang mga tulooan mahitungod kang Cristo,” diha sa ika-6 nga kapitulo, atong nabasa kini, “managpadayon kita ngadto sa kahingpitan.” Ug nahibaloan nato nga ang mga tawo sa karong panahon sa daghang mga kasimbahanan, lakip na ang Branham Tabernacle ug uban pa, hilabihan ang atong paghatag og importansiya sa pagtuon mahitungod sa mga tulooan bahin kang Cristo: Siya mao ang Anak ni Abraham, Siya mao ang Anak ni—ni *Ingon-ani-ug-ingon-ana*, ug pabalik pa, sa mga kagikanan. Apan ang ingon sa Biblia, “Biyaan na nato ang ingon nianang mga butang, ug managpadayon ta ngadto sa kahingpitan.”

⁵³⁶ Hinoon kinahanglan man gyud nga hibaloan n'yo una ang doktrina, ug kinahanglan usab ninyong hibaloan ang tanan niining mga butanga; dayon biyaan na nato ang mga niini, ingon niya, ang mahitungod sa pagkabanhaw sa mga patay, pagpandong sa mga kamot, mga pagbautismo, ug ang tanang mga patay nga butang mahitungod sa Dios. Tungod, wala—wala ma'y Kinabuhi diha sa mga niini. Pero ang iglesia sa karong panahon nagakaungot na man sa ingon-anang mga butang, “Oh, nagatoo kami sa pagka-Dios ni Cristo.” Oo. Bitaw. “Nagatoo kami sa bautismo sa tubig.” Oo. Tinuod. “Pagpandong sa mga kamot.”

⁵³⁷ Ang ingon ni Pablo, “Atong pagabuhaton kining tanan kung igatugot sa Dios. Apan bisan pa nianang tanan, biyaan na nato kini karon, ug managpadayon ta ngadto sa kahingpitan.”

⁵³⁸ Bueno, dili man mamahingpit ang iglesia pinaagi'g mga organisasyon. Nagakahalayo hinoon kini sa Dios, sa kanunay, o nagakahalayo ta sa usa'g usa. Tungod nagabutang man ta og mga babag, ginapahimulag nato ang atong mga kaugalingon,

nga daw sa wala tà nakabaton sa Pagtoo. Apan kung biyaan lang nato ang ingon nianang mga prinsipyo sa doktrina, og kung managpadayon kita ngadto sa kahingpitan, nan ang ingon nianang mga gagmay'ng butang mamahimo nang dili ingon kamahinungdanon.

⁵³⁹ Nagasulod kita ngadto sa usa ka pagpakigrelasyon, ug nahibaloan nato nga ang bugtong paagi aron mamahingpit kita mao gyud ang maanaa diha kang Cristo. Ug nahibaloan usab nato, pinaagi sa mga pagtudlo sa Biblia, kung unsaon nato pagpakasulod ngadto kang Cristo; dili diay pinaagi'g bautismo sa tubig, dili pinaagi sa pagpandong og mga kamot, dili pud pinaagi sa pagtudlo. “Kondili pinaagi sa usa ka Espiritu kitang tanan gibautismohan ngadto sa usa ka Lawas ug gihimong hingpit pinaagi sa Iyang pag-antus.” Dayon, lahi na ang atong hitsura. Lahi na ang atong paghunahuna. Lahi na ang atong pagpanglihok. Lahi na ang atong pagkinabuhi. Dili tungod kay usa kini ka katungdanan o tungod miyembro kita sa iglesia, kondili tungod “sa gugma nga gibubo sa Dios sa atong mga kasingkasing pinaagi sa Espiritu Santo,” nga nagapahimo kanatong mga isig ka lungsoranon sa Gingharian sa Dios, og tungod usab niana wala na'y denominasyon o mga babag man. Kitang tanan usa na ka halangdong Lawas.

⁵⁴⁰ Karon andam na kita nga sugdan ang pang-buntag nga leksyon, sa pipila ka gutlo. May usa pa ka butang diay ang gusto kong lakbitan dinhi, nga, nga, gipamulong ni Pablo sa Basahon, sa ika-7, o, sa ika-6 nga kapitulo, makita nato dinhi nga gihimo na kitang hingpit diha kang Cristo. Dayon sa ika-13 nga bersekulo sa ika-6 nga kapitulo, para sa diyutay lang nga basihanan.

Kay sa pagsaad sa Dios kang Abraham, sanglit wala na ma'y labing daku kay kaniya nga iyang kapanumpaan, siya nanumpa sa iyang kaugalingon,

Nanumpa ang Dios sa Iyang Kaugalingon, tungod wala ma'y si bisan kinsa nga labing daku nga Iyang kapanumpaan.

⁵⁴¹ Karon buut natong balikan sa kini. Mobasa kita sa Mga Taga-Galacia sa makadiyut lang. Atong balikan ang Basahon sa Mga Taga-Galacia, ug ablihan ang Mga Taga-Galacia 3:16. Ug atong basahon dinhi sa makadiyut, kung unsa ang Iyang gipanumpa.

Karon kang Abraham gihatag ang saad ug sa iyang kaliwat. Siya wala mag-ingon, Ug sa mga kaliwatan, ingon nga daw daghan sila; kondili ingon nga usa, . . . sa kaliwat, nga mao si Cristo.

⁵⁴² Karon kung matikdan ninyo, basaha n'yo og ayo, samtang magabasa kamo.

. . . kang Abraham ug sa iyang kaliwat (pang-usahan) ang mga saad (pang-dinaghan) gihatag.

543 “Kang Abraham ug sa iyang Kaliwat.” Bueno, usa ra ang Binhi ni Abraham, nga mao si Cristo; nga gihulagway-nang-daan, diha kang Isaac.

Apan daghan man og mga anak si Abraham. Ngani aduna na man siya’y usa ka anak sa wala pa niya nabatonan si Isaac, nga nagapakita sa sayup tungod sa dili-pagtoo ni Sarah nga nagtinguha nga si Hannah na lang ang magsamkon og bata, tungod sa paghunahuna nga tigulang na kaayo siya, ug wala paminawa ang Dios ug naghimo hinoon og ubang pamaagi nga lahi sa gikasaad Niya nga pamaagi sa pagbuhat niadto.

544 Pero ginatuman man sa Dios ang Iyang saad. Bisan unsa pa kini ka dili-katoohan, obligado gyud ang Dios sa Iyang saad. Ug naghunahuna si Sarah nga tingali mahimo ra niyang gamiton si Hannah, o si Hagar, diay, nga iyang ulipon, aron mao’y maghimugso sa usa ka bata pinaagi ni Abraham, ug kuhaon ra niya ang bata. Ug si Ismael kadto, nga nahimong usa ka tunok sa unod, sukad pa kaniadto hangtud karon. Usa gihapon ka tunok sa unod, tungod kay sa iyaha man naggikan ang mga Arabo, ug sila’y ingon na gyud niana sa una pa.

545 Karon, sa unsa mang higayon nga dili n’yo toohan ang tataw nga Pulong sa Dios ug modawat hinoon og ubang pamaagi, nan mamahimo kana nga tunok sa inyong unod sukad nianang higayona. Dawata ninyo kung unsa lang ang gikasulti sa Dios. Kung gisulti Niya Kini, nan mao na gayud kana ang buut Niyang ipasabot. Oh, dalaygon ang Iyang Ngalan! Toohi lamang ang Iyang Pulong.

546 Bisan unsa pa pagpaninguha nga balewalaon, moingon, “Bueno, dili gayud Ingon-niana ang buut ipasabot Niini.” Ginapakahulogan gyud Niini kung unsa lang ang ginasulti Niini, pag nagasaad ang Dios.

547 Karon kung atong himatikdan og ayo.

...kang Abraham ug sa iyang kaliwat ang mga saad...

Ang Binhi usa ra, pang-usahan, ug ang uban pa mao ang mga saad. Adunay labaw pa sa usa nga saad, ug labaw pa sa usa ka tawo ang naglangkob sa Binhi ni Abraham. Kita n’yo? Adunay usa ra ka Binhi, pero daghang mga tawo ang naglangkob niini nga Binhi. Kita n’yo? Dili lamang sa kang Abraham, o sa kang Isaac lamang. Kondili sa... Para kini sa tanang Binhi ni Abraham. Tungod gihimo man ang mga saad para sa matag usa ug sa tanang indibiduwal nga binhi niana nga Binhi. Nasabtan n’yo ba?

548 Busa, kita, ingon nga mga patay na diha kang Cristo, sumala sa mga Kasulatan, nahimo kita nga Binhi ni Abraham ug mga manununod sumala sa saad. Dili pinaagi’g pagpamiyembro sa iglesia, o pagporma’g mga butang nga patay na, o—o uban pa. Kondili pinaagi sa pagkahimugso diha sa Espiritu ni Cristo, mga

Binhi kita ni Abraham, ug mga isigkamanunod uban Kaniya sa Gingharian.

549 Bueno padayon tà, sa pagbasa, dinha, magbasa pa kita og dugang karon, “Ang Dios nga nagapanumpa.” Karon sa ika-17 nga bersekulo sa ika-6 nga kapitulo.

Nga niini ang Dios, sanglit nagsingkamot nga labing madagayaon . . .

. . . ang Dios, sanglit nagsingkamot sa pagpakita nga labing madagayaon ngadto sa mga manunod sa saad sa pagkadili-mabalhinon sa iyang tambag, misukip og usa ka panumpa:

550 Oh, mohunong sà kita sa makadiyut lang karon. “Ang Dios nagtinguha.” Dili tungod nga kinahanglan Niyang buhaton, kondili aron masigurado kini nga butang.

551 Bueno, hingsayran na man nato nga ang Dios nahimong unod, nagpuyo ipon kanato, ngani gipadayag man Niya ang Iyang Kaugalingon nganhi sa kalibutan. Kaniadtong nahimamat Niya ang babaye nga nagapanapaw, og miingon, “Dili Ko—dili Ko ikaw ginakondena. Lakaw, og dili na magpakasala pa.” Sa dihang nahimamat pud Niya ang mga may sakit, namuhat Siya sumala mismo sa paagi sa Iyang pagpamuhat, tungod kay Dios man Siya, ug Iyang—Iyang giayo ang mga may sakit. Gibanhaw Niya ang mga patay. Gipasaylo Niya ang mga sala. Bisan unsa pa sila kaniadto, ug unsa pa ka daghan, ug bisan unsa pa sila ka nag-backslide, gipasaylo Niya sila, bisan pa man, kung may tinguha lang sila nga moduol ug mangamuyo.

552 Karon matikdi n’yo. Kung namuhat ang Dios kaniadto sa usa ka panghitabo, ug kung mahitabo man pag-usab ang mao gihapon nga panghitabo, siguradong mamuhat gyud Siya sa ikaduhang higayon sama kaniadtong namuhat Siya sa unang higayon kay kon dili nan dili Siya matarung. Kita n’yo? Mao nga bisan unsa pa kamo ka dautan sa pagpakasala, bisan unsa pa kamo ka ubos na, siguradong mamuhat gihapon Siya sa inyo sama kaniadtong namuhat Siya niadtong babaye nga nahulog kay kon dili nan nasayup diay Siya kaniadto. Ang pamatasan sa Dios mao man ang Iyang Persona, ug kung unsa Siya sa Iyang pamatasan mao kana ang nagapahayag sa Iyang Persona.

553 Ug ingon niana usab kamo, ang inyong pamatasan sa kinabuhi, ang nagasulti kung unsa kamo. Maingon sa atong nahisgotan, sa usa o duha na ka leksyon ang milabay, ginapamahayag gyud sa mga Methodist nga, “Pagnakasinggit ka, naangkon mo na Kini.” Ang ginaingon pud sa mga Pentecostal, “Sa diha nga nakasulti ka og laing mga pinulongan, naangkon mo na Kini.” Ang ingon sàb sa Shaker, “Sa diha nga nangurog ka, naangkon mo na Kini,” ingon sa Pennsylvania Shakers. Ug nasayran nato nga sayup gyud silang tanan. Tungod ang imo mang kinabuhi ang nagapamahayag Niini. Ang imong

personalidad ang nagapamahayag kung unsa ka. Maila ang usa ka tawo pinaagi sa iyang mga buhat, ug kung unsa ang iyang kinabuhi.

⁵⁵⁴ Nadungog n'yo na ang karaang estorya, “Ang imong kinabuhi nagasulti sa ingon ka lanog, nga dili ko na madungog ang imong mga pulong.” Busa kung unsa man kamo, mao gyud kamo. Tungod ginapakita man sa kinabuhi nga inyong gikinabuhi kung unsa nga matang sa espiritu ang anaa kaninyo.

⁵⁵⁵ Ug mahimo n'yong sundogon ang sayup nga butang, o, sundogon ang husto nga butang, diay. Mahimo ninyong sundog-sundogon ang usa ka Cristohanon. Apan dili magdugay, moabot gyud, ang panahon pag aduna na'y tensyon, og dinha makita kung unsa gyud kamo. Ang kadena pinakamalig-on man diha sa pinakamahuyang nga sumpay niini.

⁵⁵⁶ Kaniadtong gisulayan si Cristo nga Anak sa Dios, gipakita niadto kung unsa gayud Siya. Tinuod. Mao nga pag ginasulayan kamo, mapamatud-an gyud kung unsa kamo. Kanunay mang ginareplektar sa inyong kinabuhi kung unsa ang anaa sa kinasuloran ninyo. Sa pagdagan sa panahon, siguradoha n'yo nga dili kamo hipalgan sa inyong mga sala. Ug mao kana ang ginapaningkamotan natong isulti.

⁵⁵⁷ Miingon si Jesus, diha sa San Juan 5:24, “Siya nga nagapatalinghug,” dili siya nga nagapangurog, siya nga nagasulti, siya nga. . . “Siya nga nagapatalinghug sa Akong Pulong, ug nagatoo Kaniya nga nagsugo Kanako, adunay Kinabuhing Walay Katapusan, ug dili pagahukman sa silot; kondili miagi na gikan sa kamatayon ngadto sa Kinabuhi.”

⁵⁵⁸ Sa imo kining pagtoo. Ug ang inyong pagtoo, nga ginapamahayag pinaagi sa inyong mga ngabil, nahipadayag kana sa mga tawo nga makadungog, apan ang inyong kinabuhi bukas gayud sa tanan. Busa, bisan unsaon pa ninyo sa pagpaningkamot nga manglihok nga *ingon-niini* ug buhaton ang *ingon-niini*, dili gyud magsilbi. Kinahanglan nga maanaa gyud Kini kaninyo. Mao kana ang tinuod nga unod sa tibuok estorya. Ang inyong personal nga pagtoo sa Cristo nga nabanhaw, ingon nga inyong Manluluwas; nga Siya'y anaa sa tuo sa Dios, nagapamuhat para kaninyo niining buntaga, samtang kamo usab nagapamuhat para Kaniya dinhi ingon nga usa ka saksi. Ang usa ka saksi nagapamuhat para sa usa ka tawo, nagabarug para kanimo ingon nga usa ka saksi. Ug maingon nga ginareplektar sa inyong kinabuhi dinhi ang inyong testimonyo kang Cristo, ginareplektar pud kini didto ug ginareplektar dinhi. Ug atua man Siya didto, mao nga kung unsa Siya para kaninyo, nagareplektar kini didto ug dinhi. Busa kamo'y. . . Pinaagi sa inyong pagtoo, kamo naluwas, ug kana lamang. Busa, ang mga sensasyon, mga emosyon, mga pagbati, og unsa pa man, wala gayu'y bahin Niini. Karon, dili. . .

559 Karon, dili unta mo maghunahuna og sayup, nga dili ako nagatoo niining mga emosyon. Nagatoo man ko. Apan ang ginahisgotan nato karon, ang ginapaningkamotan natong itudlo sa mga tawo niining panahona, dili man mga emosyon. Ngani gigamit na sa yawa kanang mga butanga ug nagpatuyang na niana ang mga tawo, hangtud nga ginabasi na nila ang ilang Eternal nga kapaingnan diha sa usa ka emosyon. Ang pagsinggit, pagsulti'g laing mga pinulongan, ang pagsimba matag Dominggo, paglihok nga sama sa usa ka Cristohanon, wala gyud kana'y bili nianang adlaw. "Gawas kon ang tawo matawo pag-usab." Ug ginareplektar sa inyong kinabuhi kung unsa kamo sa kinasuloran, kita n'yo, dili sa inyong mga emosyon.

560 Mahimong adunay dugo sa imong mga kamot, makasulti ka man og laing mga pinulongan, mahimo mo mang ayohon ang mga may sakit, makapabalhin ka man og mga bukid pinaagi sa imong pagtoo, pero wala gihapon ka'y kapuslanan. Unang Mga Taga-Corinto 13. Kita n'yo? Kinahanglan man gud nga usa kini ka butang nga mahitabo pinaagi sa usa ka Pagkahimugso nga nagagikan sa Dios, ug ang Dios ang magahatud niining bag-ong Pagkahimugso nganha kaninyo, ug maghatag Siya kaninyo og bahin sa Iyang Kaugalingon. Dayon mahitabo na kana nga mga butang. Usa na kamo ka bag-ong binuhat. "Hatagan Ko sila og Kinabuhing Walay Katapusan."

561 Natun-an na nato ang pulong nga "Walay Katapusan." Ang *hangtud-sa-kahangturan* "usa ra ka gidugayon sa panahon." Ang *Eternidad* mao'y hangtud sa kahangturan, hangtud-sa-kahangturan ug hangtud-sa-kahangturan, apan adunay usa lamang ka Eternidad. Ug hingsayran nato nga nakadawat kamo og Kinabuhing Walay Katapusan, ug ang maong pulong sa Griyego mao'y *Zoe*, nga nagakahulogan og "Kinabuhi sa Dios." Ug nakadawat kamo og bahin sa Kinabuhi sa Dios, nga nagapahimo kaninyo nga espirituhanong anak sa Dios, ug kamo'y ingon gayud ka walay katapusan usab sama sa Dios nga walay katapusan. Wala kamo'y katapusan, walay kahumanan, tungod wala man kamo'y sinugdanan. Ang unsa man nga dunay sinugdanan aduna ma'y katapusan, pero kadto lang walay sinugdanan ang walay katapusan.

562 Gihigugma gyud nato kanang bililhon nga Pulong! Mao nga ang Cristohanon angay gyud nga mapalig-on diha sa Pagtoo nga sa makausa gitugyan ngadto sa mga balaan, ug dili nga magbalhin-balhin, gikan sa usa ka lugar ngadto sa usa pa ka lugar, ug magpamiyembro sa nagkadaiya nga mga iglesia. Hinoon ang unsa mang iglesia nga gusto n'yong pamiyembrohan okey ra man kana, basta usa ka lang ka Cristohanon. Pero unaha gyud úsa ninyo ang pinakaunang butang, nga mao ang Pagkahimugso nga maoy nagapahimo kaninyo nga kabanay sa Dios, maingon nga ang Dios nahimong inyong kabanay.

563 Nahimo Siya nga kabanay, aron nga Iya kamong banhawon. Pero sa dili pa Niya kamo banhawon, kinahanglan Niya úna nga hatagan kamo og Kinabuhing Walay Katapusan. Busa gikinahanglan nga mahimong kabanay ang Dios, aron angkonon ang kamatayon, aron banhawon kamo. Kung ingon niana gikinahanglan pud ninyo nga mahimong kabanay Niya, aron nga mahiuban kamo sa pagkabanhaw. Nasabtan n'yo na kung unsa kini? Pagbayloay lang kini. Ang Dios nahimong kamo, aron nga kamo mahimong Dios. Kita n'yo? Ang Dios nahimong kabahin ninyo, sa unod, aron nga kamo pinaagi sa Iyang grasya mahimo pud nga kabahin Niya, ingon-ana lang, aron magkaaduna og Kinabuhing Walay Katapusan.

564 Pagkaanindot gayud nga hulagway, ug, oh, gusto gyud nato kini.

Karon, ang Dios, sanglit nagingkamot nga labing madagayaon. . .

565 Dili ingon nga gikinahanglan Niyang buhaton, kondili tinguha Niya mismo. Malipayon kaayo ko tungod niana, dili ba kamo man usab, ingon nga nagtinguha ang atong Dios? Ania. Unsa kaha kung Siya—unsa kaha kung dili Siya mapuanguron? Unsa man ang bunga sa Espiritu? Gugma, kalipay, pagtoo, pakigdait, pagkamapuanguron. Mga kabahin kana sa Dios nga anaa kaninyo. Ug mahimo n'yo na nga mag-antus, mag-inantusay sa mga kabug-aton sa usa'g usa. Magapasayloanay sa usa'g usa, maingon nga ang Dios nagpasaylo kaninyo tungod kang Cristo. Ang Espiritu sa Dios nga anaa kaninyo ang nagapahimo sa inyo nga ingon niana. Ug kaniadtong ania pa ang Dios sa yuta ug nahimong kamo, nahimong sala, tungod giangkong man Niya ang inyong sala, gipas-an kini para kaninyo ug gibayaran ang inyong silot tungod niini. Mapuanguron gyud ang Dios, nga nag-antus sa pagpas-an sa atong mga kabug-aton.

566 Ug Siya'y usa ka maayo sàb nga Dios. Ngani kung dunay, mga butang nga gusto n'yong mahitabo sa inyong paagi, kabalo mo, maayo gayud ang Dios para buhaton kana. Gusto man gud Niya nga—nga malipay kamo. Gusto Niya nga. . . Siya—Siya mao ang gugma, ug ang Iyang dakung gugma mao'y nagatukmod Kaniya nga mokanaug usahay, aron ihatag sa inyo ang mga butang nga gusto ninyo.

567 Matikdi n'yo si Tomas, human niadtong pagkabanhaw. Dili gyud motoo si Tomas. Oh, daghan kaayo siya'y mga anak sa karong panahon. Ug miingon si Tomas, “Dili. Dili. Kinahanglan ko úna nga magkaaduna og pipila ka ebidensiya. Kinahanglan ko unang isulod ang akong mga kamot diha sa Iyang kilid, ug sa Iyang. . . ang akong mga tudlo dinhi sa Iyang mga kamot, adisir kong toohan Kini. Ako, dili ko igsapayan kung unsa ma'y inyong isulti.” Kita n'yo, wala gayud siya sa kahan-ayan sa Kasulatan, niadtong panahona. Angay unta n'yong toohan Kini. Pero ingon

siya, “Kinahanglan ko ùna nga magkaaduna og usa ka matang sa ebidensiya, aron mapamatud-an Kini.”

568 Ug nagpakita si Jesus, buutan gyud Siya, “Umari ka, Tomas, kung mao man kana ang imong gusto, bueno, ania. Maangkon mo kini.”

569 Ingon niana baya kita. Moingon tà, “Ginoo, kinahanglan kong makasulti og laing mga pinulongan. Ako—kinahanglan kong makasinggit. Kinahanglan kong . . .”

570 “Oh, sige, ihatag Ko kana kanimo.” Buutan gayud Siya.

571 Busa gisulod ni Tomas ang iyang mga kamot sa kilid ni Jesus, dayon ingon siya, “Oh, ang ako kining Ginoo ug akong Dios.”

572 Ingon Niya, “Karon, Tomas, mitoo ka sa diha nga imong nakita. Apan mas daku ang ganti ngadto kanila nga walay ebidensiya ug sa gihapon nagatoo Niini!” Mao kana. Dinha kita angay’ng mahidangat. “Grabe ka mas daku ang ganti kanila nga walay nakita apan sa gihapon nagatoo Niini.” Usa kana ka buhat sa pagtoo, nga atong gidawat Kini.

573 Bueno, nagatoo man ko sa mga ilhanan nga naganunot sa mga magtotoo, pero iplastar úsa nato ang mga unang butang. Mahimong magkaaduna kamo og mga ilhanan, nga wala Kini. Miingon si Pablo nga mahimo ninyo. Ingon siya, “Makasulti man ako og mga pinulongan nga iya sa mga tawo ug sa mga Manulonda; wala ako’y kapuslanan. Makapabalhin man ako og mga bukid pinaagi sa akong pagtoo; walay ako’y kapuslanan. Masabtan ko man ang Biblia, sa paagi nga masayran ko ang tanang mga tinago sa Dios; wala ako’y kapuslanan.” Kita n’yo, mga gasa kana sa Balaang Espiritu, nga wala ang Balaang Espiritu.

574 Ang Balaang Espiritu mao ang Dios. Ang Dios mao’y gugma, kalipay, pakigdait, pagkamapuanguron, kaaghop, og pailub. Mao kana ang Espiritu sa Dios. Mao kana ang pagabanhawon sa Dios sa kaulahiang mga adlaw, pinaagi sa Espiritu.

575 Karon, “Wala magtinguha . . .”

. . .ang Dios, sanglit nagingkamot sa pagpakita nga labing madagayaon ngadto sa mga manununod sa saad. . .

. . .ang Dios, nagingkamot . . .sa pagpakita . . .sa mga manununod . . .

Kinsa ba ang mga manununod? “Kita, ingon nga mga patay na diha kang Cristo, nahimong Binhi ni Abraham, ug mga manununod.” Oh, mituhop ba kini? Mga manununod kita sa Gingharian sa Dios, pinaagi sa usa ka saad nga gipanumpa. Dili man kinahanglang manumpa ang Dios. Tungod hingpit man ang Iyang Pulong. Apan nanumpa Siya, usab, sa Iyang Kaugalingon, kay wala na ma’y laing labing daku.

576 Padayon tà sa pagbasa, sa makadiyut lang, paminawa n'yo.

. . . sa saad sa pagkadili-mabalhinon sa iyang tambag, misukip og usa ka panumpa:

577 “Pagkadili-mabalhinon,” ang walay-pagkausab. Dili mahimong mausab ang Dios. Kinahanglan magapabilin Siya nga mao sa gihapon. Ug kung nag-ayo ang Dios og usa ka masakiton, nan dili na gyud Niya puedeng usabon ang Iyang buhat. Kon nagpasaylo ang Dios og usa ka makasasala, usa ka bigaon, dili na gyud Niya puedeng usabon ang Iyang buhat. Ang pagkadili-mabalhinon, ang walay-pagkausab nga Pulong sa Dios. Miingon ang Dios, sa usa ka bahin, “Ako ang Ginoo Kinsa mao’y nagaayo sa tanan mong mga balatian.” Kinahanglan Niyang magpabilin Niini, kay Siya wala ma’y kinutoban. Hingsayran na Niya ang katapusan gikan sa sinugdan.

578 Karon, masulti ko, “Buhaton ko *kini*.” Ug ang ingon sa Biblia, nga angay natong isulti, “Kung itugot sa Ginoo.” Tungod kay, usa ra man ako ka mortal. Wala ako masayod. Ngani usahay kinahanglan kong bakwion ang akong pulong, apan dili gyud mahimong bakwion sa Dios ang sa Iyaha. Dios man Siya.

579 Ug may usa lang ka butang ang gihangyo Niya, “Kung mahimo mong toohan.” Oh, pagkanindot! “Kung mahimo mong toohan, ang tanang butang mamahimo.” “Kung mahimo mong toohan,” kana lang. “Kamo, kung mahimo ninyo,” mao kana ang pangutana. Pero ang pangutana dili mahitungod sa Pulong sa Dios, tungod kay, sa Iyang pagkadili-mabalhinon, dili man Siya mahimong mausab. Pagkaanindot gayud!

580 Karon paminaw mo, samtang padayon tà nga magbasa.

Nga pinaagi sa duha ka butang nga dili mabalhinon, nga tungod niini dili gayud mahimo nga mamakak ang Dios, . . .

Imposibli gayud! Ang pagka-imposibli ug pagkadili-mabalhinon halos mao ra nga pulong; dili mausab, dili mabalhin. Kinahanglan kining magpabilin nga mao sa gihapon hangtud sa kahangturan. Dili mahimong mausab, ang pagkadili-mabalhinon ug ang pagka-imposibli.

Ug duha, pinaagi sa duha ka butang nga dili mabalhinon, nga tungod niini dili gayud mahimo nga mamakak ang Dios, . . .

“Aduna kita’y duha ka butang?” Oo. Una, miingon ang Iyang Pulong nga pagabuhaton Niya kini. Ang ikaduha mao ang gipanumpa Niya nga saad bahin niini, nga pagabuhaton Niya kini. Oh, pagkanindot!

581 Unsa ba kita nga klase sa mga tawo? Nganong nagabalhin-balhin man kita ug nagabagdoy-bagdoy, ug nagaambit sa mga butang nga iya sa kalibutan ug nagapanglihok nga sama niining sa 1957 nga modernong-modelo sa Cristianismo? Tinguhaon unta

nato nga mamahimong mga kinaaraan nga klase nga ginatoohan ang Dios sa Iyang Pulong, ug ginatawag kadtong mga butang nga wala nagalungtad, ingon nga nagalungtad. “Kung mao kana ang giingon sa Dios, nan mao na Kana.”

⁵⁸² Si Abraham, nga gikahatagan og saad, kaniya ug sa iyang Binhi, gitawag niya ang mga butang nga wala nagalungtad, ingon nga nagalungtad. Kay, saad man Kadto sa Dios, og nasayod nga dili mahimong mamakak ang Dios. Gisaad Niya kadto sa iyaha, ug mitoo siya Niini. Ug sa paglabay sa mga tuig, daw sa nagakadugay nga nagakadugay ang saad, para sa natural nga mata, pero nagakahaduol hinoon Kadto para kang Abraham.

⁵⁸³ Imbis nga maluya, ug moingon, “Buena, basin wala gyu’y ingon nianang butang nga sama sa Balaanong pagpang-ayo. Siguro ako na lang-... Basin wala gyud diay ingon nianang butang. Tingali’g nasayup lang ko sa akong pagsabot.” Kung ingon niana, nagapakita lang kana og usa ka butang, nga wala ka pa natawo pag-usab. “Kay mahitungod...”

⁵⁸⁴ Nahisgotan na nato kini niadtong miaging Dominggo, sa may unahan lang nga bahin sa kapitulo. “Kay mahitungod niadtong tawo nga nakatilaw na unta sa makausa sa Langitnong mga gasa ug mga ingon-anang butang, unya mahulog, dili na mahimo ang pagpabag-o sa iyang kaugalingon ngadto sa paghinulsol.” Walay pagduhaduha, dili na gayud mahimo!

Kay siya nga *gipanganak gikan sa Dios* dili na ug dili mahimong *makasala*; kay ang *binhi* sa Dios nagapabilin *man kaniya*: *ug siya dili makasala*, . . .

Ang Binhi sa Dios mao ang Pulong sa Dios. “Ang pagtoo nagaabot pinaagi sa pagpatalinghug, sa pagpatalinghug sa Pulong, ‘Nahalad na ang Halad. Tapos na.’”

⁵⁸⁵ Karon, kung makabuhat ka og sayup, nan papanubagon gyud ka sa Dios tungod niana. Apan kung makabuhat ka man, masayup ka, wala man gyud nimo gituyo kana nga buhaton. Sa ika-10 nga kapitulo, ika-47 nga bersekulo, sa hunahuna ko, “Kay kung magpakasala kita sa tinuyo human nga madawat nato ang kahibalo sa Kamatuoran.” Apan pagkahuman mo nga Matawo sa makausa, naangkon mo na ang Kamatuoran; dili ang kahibalo Niini, kondili gidawat mo na ang Kamatuoran ug nahimo na Kini nga realidad. Ug usa na ikaw ka anak sa Dios, ilalum sa panahon ug Eternidad. Nanumpa ang Dios nga buhaton Niya kini.

⁵⁸⁶ Miingon si Jesus, “Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing Walay Katapusan, ug pagabanhawon Ko siya sa kaulahiang adlaw. Siya dili na Pagahukman sa silot. Miagi na siya gikan sa kamatayon ngadto sa Kinabuhi.” Karon ang ingon

niana nga pagpanumpa, “Nagtinguha ang Dios nga madawat nato Kini.”

⁵⁸⁷ Karon matikdi n’yo ang iyang ginaingon dinhi, nagapamulong si Pablo ngadto sa—sa iglesia.

. . . dili gayud mahimo nga mamakak ang Dios, angay kita nga makabaton og malig-on nga kadasig, . . .

Dili nga, “Bueno, kung dili gani ko tagdon sa husto sa mga Baptist, nan sa mga Methodist na lang ko moadto.” Kita n’yo?

. . . kita kinahanglan nga makabaton og malig-on nga kadasig, kita nga nanagpangalagiw aron kapanalipdan sa pagpangupot sa paglaum nga gibutang sa atong atubangan:

⁵⁸⁸ Karon basahon tà ang kaulahian nga bahin.

Ginabatonan tà kini ingon nga sinipit sa kalag, . . .

Ang paglaum, ang gipanumpa sa Dios, nga atong ginabatonan ingon nga sinipit sa kalag, nga siguro ug malig-on, ug nagasulod ngadto sa sulod sa tabil;

⁵⁸⁹ Hisgotan sà nato sa makadiyut ang mahitungod “sa tabil.” Wala man gud nato kini nahisgotan og ayo niadtong miaging Dominggo sa gabii.

⁵⁹⁰ “Sa sulod sa tabil.” Ang tabil mao ang unod. Ang tabil ang nagababag kanato nga makita ang Dios, sa nawong og nawong, niini nga iglesia. Ang tabil ang nagababag kanato nga makita ang mga Manulonda sa ilang mga puwesto niining buntaga, nga nanagtintog tupad sa mga lingkoranan. Ang tabil ang nagababag kanato nga makita Siya. Natago kita sa luyo sa tabil, ug kana nga tabil mao ang unod. Mga anak nga lalaki ug mga anak nga babaye kita sa Dios, anaa kita sa Presensiya sa Dios, “Ang mga Manulonda sa Dios nagapahaluna palibot ngadto kanila nga may kahadlok Kaniya.” Anaa kita sa Presensiya sa Dios, sa tanang panahon. “Dili Ko kamo biyaan, ni dili Ko kamo talikdan. Ako magauban kaninyo sa kanunay, bisan hangtud sa katapusan.” Apan ang tabil nga mao ang unod, ang nagababag kanato sa Iyang Presensiya. Pero pinaagi sa kalag, ang Espiritu, pinaagi sa atong pagtoo nasayod kita nga nagatan-aw Siya kanato. Nagatindog Siya tupad nato. Ania Siya karon.

⁵⁹¹ Didto sa Dothan, usa niadto ka buntag, usa ka tigulang nga propeta ang gipalibotan sa mga kasundalohan ug migawas ang iyang sulogoon ug miingon, “Oh amahan, napalibotan na sa mga langyaw ang tibuok nasud.”

⁵⁹² Ug mitindog si Elias, ug miingon, “Aba, anak, mas daghan pa ang nagauban kanato kay sa nagauban kanila.”

⁵⁹³ Bueno, namilok siya ug mitan-aw sa palibot. Pero wala ma’y bisan usa nga iyang nakita.

⁵⁹⁴ Ingon ni Elias, “Dios, buut ko nga ablihan Mo unta ang iyang mga mata, wagtanga ang tabil.” Ug sa nawagtang na ang tabil sa iyang mga mata, nakapalibot diay niadtong tigulang nga propeta ang mga carro nga kalayo, Nagdilaab ang mga kabukiran tungod sa mga Manulonda ug mga carro. Tan-awa.

⁵⁹⁵ Oh, miingon dayon si Gehazi, “Ako—ako nang nasabtan karon.” Kita n’yo, nawagtang na man ang tabil. Mao kadto ang babag.

⁵⁹⁶ Ania. Kupti n’yo kini pag-ayo. Ang tabil ang nagababag kanato nga maikinabuhi ang angay natong ikinabuhi. Ang tabil ang nagababag kanato nga buhaton ang mga butang nga gusto gyud natong buhaton. Ug ang Dios kaniadto natabilan sa unod, ug ang maong tabil nagilis sa duha. Ug ang Dios nahimong Dios pag-usab, ug Iyang gibanhaw ang tabil nga gitagoan Niya sa Iyang Kaugalingon. Mao kana ang pagkabanhaw ni Ginoong Jesus. Ginapamatud-an kanato nga, dinhi niining tabil kon diin kita nakatago karon, ginatoohan nato Kini ug ginadawat Kini pinaagi sa pagtoo. Ug pag magilis na sa duha *kini* nga tabil, moadto na ako sa Iyang Presensiya nga dala kini nga kasiguradohan, og nasayod nga, “Maila ko Siya sa gahum sa Iyang pagkabanhaw.” Sa Pag-abot ni Ginoong Jesus, pagabanhawon kini nga tabil, sa usa ka hingpit nga paagi, hangtud nga molakaw ako ug makig-istorya Kaniya ingon nga akong Manluluwas ug akong Dios, sa diha nga molingkod na Siya sa trono ni David. Ug mabuhi na kita hangtud sa kahangturan sa niini nga tabil human nga kini mahingpit na, tungod aduna pa ma’y sala sa niini nga tabil karon. Dili igsapayan kung unsay. . . Mao nga ayaw mo paghunahuna nga gihimaya na kining lawas dinhi sa yuta. Kinahanglan pa kining mamatay, sama ra sa imong kalag nga kinahanglan mamatay, aron matawo pag-usab.

⁵⁹⁷ Sa kahingpitan, ang dili pagkaon og mga karne, ug pagbuhat og *ingon-niini*, ug paghingpit sa lawas, dili mo man maangkon kini. Ug kinahanglan mong undangan ang *ingon-niini*, ug buhaton ang *ingon-niini*, ug buhaton ang *ingon-niini*, ug buhaton pud ang *ingon-niini*, balaod man kana. Mao kana ang sa mga legalista. Wala kita nagatoo sa pang-legalista nga porma sa kaluwasan. Kondili nagatoo kita Niini nga pinaagi sa grasya kita naluwas. Ug dili kamo ang nagabuhat. Wala kamo’y unsa man nga gibuhat para niini. Kondili ang pagpili sa Dios ang nagabuhat niini. “Walay tawong makahimo sa pag-ari Kanako gawas kon pagadanihon siya sa Akong Amahan.” Tinuod kana. Ug Siya. . . Ang gianhi lamang ni Jesus mao’y para kuhaon sila nga mga giila-nang-daan sa Amahan; ug sila nga mga gipili-nang-daan sa Dios sa wala pa ang pagkatukod sa kalibutan para mahimong mga anak nga lalaki ug mga anak nga babaye sa Dios. Amen. “Kini dili kaniya nga nagapaningkamot, o sa kabubut-on sa tawo, kondili sumala sa Dios nga nagapakita og kalooy.”

Ang Dios mismo ang nagabuhat niini. Mao nga dili gyud kamo makapangandak, man lang. Tungod wala ma'y ni usa ka butang nga inyong gibuhat para niini. Ang Dios, pinaagi sa grasya, ang nagluwas kaninyo; dili nga kamo, sa inyong kaugalingon. Kay kung kamo man, nan aduna kamo'y ipangandak. Pero wala gyud kamo'y unsa man nga angay'ng ipangandak. Ang tanang mga pagdayeg para Kaniya lamang. Siya man ang nagabuhat. Busa gihatag Niya kaninyo ang sigurado nga paglaum, "Gipanumpa ang usa ka saad, nga dili gayud mahimong malaglag ang Iyang mga anak."

⁵⁹⁸ Bueno, ginakastigo sila tungod sa pagbuhat og sayup. Pagaanohon mo man ang imong gipugas. Nasabtan n'yo. Mao nga ayaw mo paghunahuna nga puede ra kamong magbagdoy-bagdoy ug magpakasala, og pasagdan lang nga makalusot niana. Kay kung mao man, nga aduna mo'y ingon-ana nga taras, nan nagapakita kana nga wala pa gayud kamo natawo pag-usab. Nasabtan n'yo ba? Kung aduna sa gihapon kamo'y pangibog sa kinasuloran ninyo, nga mobuhat og sayup, nan sayup gyud kamo bisan pa man. Kita n'yo? "Kay Iya na mang gihingpit, hangtud sa kahangturan, kadtong mga . . . Ug kadtong mga mananap ilalum sa Daang Tugon, ilalum sa panahon sa balaod, nga ginahalad matag tuig, sa kanunay, dili gayud makawala sa sala." Apan kon ibutang nato ang atong mga kamot nganha sa Iyang ulo, ug isugid ang atong mga sala ug matawo pag-usab sa Espiritu sa Dios, nan wala na kita'y pangibog pa sa sala. Milabay na man sa inyo ang sala. Sa panahon ug Eternidad.

⁵⁹⁹ Masayup man kamo. Mahulog kamo. Makabuhat man kamo og sayup sa tinuyo. Mogawas kamo usahay ug makabuhat og mga butang. Pero wala nagapasabot nga nalaglag na kamo. Nagapasabot lang nga makadawat kamo og pagpanul-id.

⁶⁰⁰ Ngani ang akong anak nga lalaki, sa makadaghan nang higayon, ang akong mga anak, makabuhat pud sila og mga butang. Ang inyong mga anak, usab. Nga imong . . . Ingon nga nahibalo na sila nga supak kana sa imong-imong patakaran. Ug mao nga kabalo na sila kung unsay nagahulat sa ilaha pag aduna sila'y buhaton. Mabunalan gyud sila tungod niana, usahay mas grabe pa gani. Pero bisan pa man anak mo gihapon kana. Mao gayud.

⁶⁰¹ Dili na gyud mahimo nga mawala pa pag-usab ang tawo, nga sa makausa natawo na sa Kinabuhing Walay Katapusan. Ang Dios dili man nagahatag unya ginabakwi ra pud. "Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing walay katapusan; ug dili na Pagahukman sa silot, kondili miagi na gikan sa kamatayon ngadto sa Kinabuhi. Pagabanhawon Ko siya sa kaulahiing mga adlaw." Mao kana ang saad sa Dios.

602 Karon kung magpadayon kamo, og moingon, “Oh, bueno, kung ingon-niana mabuhat ko diay. . .” Sa kanunay mabuhat man nako kung unsa ang gusto nakong buhaton. Pero kung usa ikaw ka Cristohanon, dili gyud nimo gustong buhaton ang butang nga sayup, tungod kay anaa man kanimo ang mismong Kinabuhi, ang mismong pundasyon. Kung gusto mong mobuhat og sayup, nan nagapakita lang kana nga sayup diay nga butang ang anaa *dinha*. “Unsaon man pagbugwak sa pait ug tam-is nga tubig gikan sa mao ra nga tuboran?”

603 Busa kon bug-os ka man nga nalibog sa kung unsa nga matang sa emosyon, o katingalahang *butang* nga sensasyon: Kalimti na kana! Balik ka ngadto sa altar ug moingon, “Dios, tangtanga intawon ang kanhi kong makasasala nga kinabuhi, ug ipahimutang ako sa usa ka kahimtang nga ang akong tibuok tinguha. . .”

“Siya nga gipanganak gikan sa Dios dili magahimo og sala.” Husto kana. Tungod wala man siya’y pangibog nga buhaton kana.

604 Siguradong, malit-ag man siya sa yawa *dinhi* ug *dinha*, pero dili ingon nga tinuyo. Mao kana’y giingon sa Biblia. Malit-ag man siya sa yawa, sa karon ug unya. Oo, buhaton gyud sa yawa. Ngani gisulayan man niyang maghan-ay og lit-ag para sa atong Ginoong Jesus kaniadto. Gibuhat pud niya kang Moises, ug nalit-ag siya. Gibuhat sàb niya kang Pedro, ug nalit-ag siya. Gibuhat niya kana sa kadaghanan, apan. . . Gilimod pa gani ni Pedro si Jesus, apan miadto siya ug mihilak gayud pag-ayo. Aduna ma’y Butang sa kinasuloran niya.

605 Kaniadtong gipagawas na ang salampati gikan sa arka. . . Gipagawas pud ang uwak, og nagatingog-tingog kadto. Okey man siya didto sa sulod sa arka, pero sa dihang migawas na siya, nan lahi na ang kinaiyahan niya. Nahimo niya nga kaonon ang tanang dugay nang patay’ng lawas nga gusto niya, ug nabusog siya. Ngano man? Usa man siya ka uwak, sa sugod pa lang. Usa siya ka nagakaon og mga patay na. Dili siya maayo. Usa siya ka tigpakaaron-ingnon nga nagatugdon sa tugdonganan kauban ang salampati, og maingon pud ka daku sama sa salampati. Makalupad siya sa bisan asa man nga nagalupad ang salampati. Pero mahimo pud niyang mokaon og maayo nga pagkaon nga sama sa ginakaon sa salampati. Ug mahimo niyang mokaon og dunot na nga pagkaon, nga dili mahimong kaonon sa salampati. Tungod kay, lahi man ang kinaiyahan sa salampati. Lahi ang pagkabuhat sa iyaha. Usa siya ka salampati. Ug ang salampati dili man mahilisan sa dunot na nga pagkaon, tungod kay wala man kini’y apdo.

606 Ug ang usa ka tawo nga gipanganak sa Espiritu sa Dios nahimo nang usa ka salampati sa Dios, ang kinaiyahan niya, ang pagbag-o sa iyaha, og ang pagkahimo sa iyaha. Oo, sir.

Kon ibutang mo ang espiritu sa—sa salampati diha sa uwak, dili na gyud kini motugdon pa sa usa ka patay na nga lawas. Kung makatugdon man siya dinha nga wala tuyoa, nan siguradong mopahilayo gyud siya sa gilayon. Tungod dili man siya makaagwanta niana. Ug ang usa ka tawo nga gipanganak na sa Espiritu sa Dios, dili gyud nagauyon-uyon lang. Tingali'g makasulod siya sa usa ka balay-imninan usa ka higayon, pero mohawa gyud siya didto sa gilayon. Tingali'g danihon siya sa usa ka babaye, para palingion siya, pero ilingiw ra usab niya ang iyang ulo. Mopahilayo gyud siya dayon gikan didto. Ngano man? Usa siya ka salampati. Tinuod kana. Dili mo siya mahimong limbongan tungod kay nasayod gyud siya. “Ang Akong mga karnero nakaila sa Akong Tingog, ug sa usa ka dumuloong dili sila monunot.” Usa siya ka salampati, sa sugod pa lang. Mao kana ang akong ginahisgotan, ang tinuod nga butang nga nakaangla dinha.

607 Matikdi n'yo og ayo karon. “Nanumpa ang Dios.” Oh, kini. . .

Ang paglaum nga atong ginabatonan ingon nga sinipit sa kalag, nga. . . malig-on, ug nagasulod ngadto—ngadto sa sulod sa tabil;

608 “Ang tabil.” Mikanaug ang Dios, nga natabilan sa unod. Aron buhaton ang unsa? Aron ipakita ang Iyang Kaugalingon. Gikinahanglan Niya nga magtago, tungod kay dili man nato Siya mahimong makita. Ug natago Siya sa luyo sa tabil. Ug si Kinsa man ang maong tabil? Si Jesus. “Dili Ako ang nagabuhhat sa maong mga buhat, ang Akong Amahan,” ang ingon ni Jesus. “Ang Akong Amahan nga nagapuyo Kanako. Mao nga nagapangbuhhat Ako. Ang Amahan nagapangbuhhat, ug Ako nagapangbuhhat hangtud karon.” Ania Siya ingon nga Mao ang natabilan, nagalakaw diha sa unod, ang Dios, Emanuel, ang Dios uban kanato. “Ang Dios diha kang Cristo, nagapasig-uli sa kalibutan ngadto sa Iyang Kaugalingon.” Ania Siya, nagalakaw.

609 Bueno, mikanaug Siya ug naghimo og pagpabalaan, o pamaagi, o halad-pasig-uli, aron nga pinaagi sa kamatayon nga Iyang gihalad, mabayran ang bili sa sala, aron makabalik Siya ug magpuyo nganhi kanato. Mao nga ang pagtoo nga aduna kita usa—usa kini ka pagtoo nga natabilan, o usa ka tawo nga natabilan. Busa wala kita nagatan-aw sa mga butang nga atong makita sa niini nga tabil. Ang maong tabil aduna man gud og mga edukasyon, ug nagabuhhat kini og mga butang ug nagasulti og mga butang. Siyentipikanhon kini. Apan ang Espiritu sa buhi nga Dios nga nagapuyo dinhi, ginatawag kadtong mga butang nga wala nagalungtad, ingon nga nagalungtad, ingon nga mao'y gisulti sa Dios. Mao kana ang inyong tabil. Anaa kita sa sulod sa tabil.

610 Bueno, sa umaabot nga adlaw pagabanhawon Niya kini nga tabil, nga dili na natawo sa usa ka babaye pinaagi'g pangibog sa pakighilawas tali sa lalaki ug babaye, kondili pinaagi sa kabubut-on sa Dios magasulti lang Siya ug motungha ang tawo. Dayon magkaaduna kita og lawas nga sama sa Iyang Kaugalingong mahimayaon nga lawas. Pagatabilan kita, aron nga mahimo natong maistorya ang usa'g usa, og malamano ang usa'g usa.

611 Karon, pag motaliwan na kita dinhi, adunay usa ka tabernakulo, usa ka theophany, nga dagway sa tawo, nga dili nagakaon, dili nagainom, dili nagakatulog, kondili nagmata lang hangtud sa kahangturan. Dinha kita mopaingon. Apan nagahulat pa sila ilalum sa Halaran, nga nanagtuaw, "Ginoo, unsa pa ba ka dugay? Unsa pa ka dugay?" nga makabalik. Tungod kay, gusto na man nilang makiglamano sa usa'g usa. Gusto nilang molingkod ug mokaon, ug makig-istorya sa usa'g usa. Mga tawo man sila. Dalaygon ang Ngalan sa Ginoo!

612 Sa dihang gibuhat sa Dios ang tawo diha sa Kaugalingon Niyang dagway sa sinugdan kaniadto, gibuhat Niya ang tawo nga ingon niadto. Nagpakig-fellowship Siya sa usa'g usa, tungod kay kaila man nato ang usa'g usa. Gusto nato ang mga butang nga gihimo sa Dios para sa ato, tungod kay gibuhat man kita nga ingon niana. Sa Iyang mahimayaong Pag-abot, kadtong mga nakaandam na mamahimo gayud nga ingon niana hangtud sa kahangturan. Wala na'y kamatayon, og mamahimo kita nga sama na sa Iyang porma. Oh, dalaygon ang Ngalan ni Cristo!

613 Ug karon aduna na kita og patinga sa atong kaluwasan, tungod sa pagdawat nato Kaniya ingon nga atong personal nga Manluluwas, ingon nga atong Mananambal. Kining tanan mao ang mga ganti, o, ang mga dibidendo nga gibayran na sa insurance policy. Amen. Kabalo na man mo kung unsa ang insurance policy. Mahimo kamong makakuha og mga dibidendo pag maabot na ang tibuok bili niini. Mao gayud. Mahimo kamong makadawat og mga dibidendo. Ug nagadawat na man ta og mga dibidendo karon. Ang nakanindot, pa gyud, sa diha nga makadawat kita og mga dibidendo, motubo na usab ang maong tibuok kantidad.

614 May usa ka ahente sa insurance, usa niadto ka higayon, ang miingon sa ako, "Billy, gusto ko unta nga maghanyag sa imoha og usa ka insurance."

Ingon ko, "Aduna na man ko'y ingon-ana." Mitan-aw gud sa ako ang akong asawa.

615 Bueno, wala man ko'y bisan unsa nga pagbatok sa insurance. Pero ang ubang mga tawo "walay insurance." Busa, milingi sila. Ingon ang ahente . . .

616 Mitan-aw sa ako ang akong asawa, nga natingala, "Aduna na diay ka'y insurance?"

617 Ingon ko, “Oo.” Pero wala siya’y hibangkaagan niadto.

618 Ingon ang ahente, “Bueno, Billy, unsa man nga matang sa insurance ang imong nakuha?”

619 Ingon ko:

Ang mapanalanginong assurance, nga si Jesus
anaa kanako!

Oh, pagkaanindot nga pasiuna sa Balaanong
himaya!

Usa ka manununod sa kaluwasan, nga
gibayran na sa Dios,

Natawo na sa Iyang Espiritu, og hinugasan na
sa Iyang Dugo.

620 Ingon siya, “Maayo gyud kana, Billy,” ingon pa siya, “pero dili ka man mapahimutang niana dinhi sa lubnganan.”

621 Ingon ko, “Apan ipahigawas man ako Niini. Mao kana ang pinakamahinungdanong butang.” Wala ko ginakabalak-an ang mapahimutang dinha; ang akong ginakabalak-an hinoon ang mapahigawas dinha.

622 Ug tungod nga naangkon ko na ang kasiguradohan, pinaagi sa nanumpa nga Dios sa Eternidad, nga banhawon Niya ako diha sa dagway sa Iyang Anak, sa kaulahiing adlaw, nan maisogon akong magalakaw ug adunay kahupayan ug angkla sa kalag, nga, samtang ania ako sa niini nga tabil adunay usa ka Butang nga dili-makita ang nag-angkla na kanako dinha sa Bato sa mga kapanahonan. Mobul-og man ug mohampak ang katubigan, wala kana’y diperensiya. Kung kamatayon man, mga katalagman, o unsa man, dili gyud kana makapahimulag kanato gikan sa gugma sa Dios. Nagakupot gayud ang akong angkla sa sulod sa tabil. Motaas man ang mga baha. Mobul-og man kini. Motungha man ang mga wala nagatoo sa Dios. Pero ang magtotoo nga natawo na pag-usab aduna ma’y angkla. Hinoon dili pa ninyo makita ang sulod niini nga tabil. Apan nasayod ako nga nakakupot na gyud ang akong angkla dinha sa Bato sa mga kapanahonan, Nga may gipanumpa nga saad nga Iya akong banhawon sa kaulahiing adlaw.

623 Dili ikatingala nga mahimo ra ninyong tutokan ang kamatayon, ug moingon, “Hain na ang imong ikot? Lubnganan, hain na ang imong pagdaug? Apan salamat sa Dios Nga nagahatag kanato og pagdaug pinaagi sa atong Ginoong Jesus Cristo.”

Diin ingon nga mag-uuna . . .

Oh, pagkanindot! Pero basin dili na kita makadangat sa atong leksyon mismo.

Diin ingon nga mag-uuna . . . tungod kanato

624 Usa ka mag-uuna. Namatikdan n’yo ba, kaniadtong karaang panahon sa kasadpan (Makadaghan nang higayon nga nakalatas

ako sa maong karaang mga dalan.), usa ba ka mag-uuna, o manunuhid? Pag hapit nang mamatay ang karaban, tungod sa kakulang og tubig, nan magdagan sa unahan ang maong manunuhid. Ug makita niya ang mga tribo sa mga Indiano; labyan ra niya sila. Ug makita niya didto kon diin adunay usa ka tuboran sa tubig. Magdalidali dayon siya nga mobalik para sultihan ang agalon sa karaban, “Paspasi n’yo ang pagpadagan sa mga kabayo, magmaisogon ang tanan, tungod kay didto sa may ibabaw sa bukid adunay dakung tuboran sa tubig.” Usa siya ka mag-uuna.

⁶²⁵ Ug ania, ang Mag-uuna. Natanggong sa yawa ang tawo kaniadto, tungod sa sunod-sunod nga pagrakrak, apan Adunay misulong sa nahimutangan sa machine gun. Si Jesus kadto. Nag-una na sa ato ang Mag-uuna. Ug nagatindog didto si Satanas nga dunay usa ka machine gun, gitanggong niya kita, mao nga kanunay’ng anaa kita sa pagkaulipon ug nagakahadlok sa kamatayon. Ginabantayan niya kadtong Tuboran. Oo, ginabantayan niya. Gisugo man siya, tungod kay nakasala man kita ug gipapahawa gikan Didto. Apan ang Mag-uuna, si Cristo, misulod ug misulong sa puwesto.

⁶²⁶ Nadungog n’yo na ba ang karaang kanta, “Bantayi n’yo ang kuta, kay paingon na ako”? Bantayan ang kuta, dili na; sulogon na nato kini. Dili na gani nato kinahanglang bantayan pa kini. Gisulong na man ni Cristo ang kuta. Alleluyah! Bukas na ang pultahan. “Adunay usa ka Tuboran nga bukas sa balay sa Dios, sa siyudad ni David, alang sa paghinlo, alang sa paghinlo sa mga mahugaw.” Misulod na alang kanato ang atong Mag-uuna.

⁶²⁷ Ang Mag-uuna, gisultihan Niya kita, “Adunay usa ka dapit, sa pikas bahin, kon diin dili na kamo magakatigulang pa.” Kon diin wala na’y mga kunot, kon diin dili n’yo na kinahanglang mogamit pa og Max Factor’s para mahimong nindot ang inyong hitsura ngadto sa inyong bana. Nag-una na man ang Mag-uuna. Adunay usa ka dapit kon diin dili na kamo magakatigulang pa ug kapoyon ug magakurog-kurog. Adunay usa ka dapit kon diin dili na kamo magkaaduna og sakit. Kon diin ang bata dili na mabutodan. Kon diin dili na kamo matangtangan og pustiso, o ngipon, og magpapistiso pa. Alleluyah! Oh, dalaygon ang Iyang Ngalan! Misulod Siya, ug ingon nga wala na’y kamatayon mamahimo kita nga sama na sa Iyang porma, sa umalabot nga adlaw didto. Magadan-ag sila nga labaw pa sa mga bitoon ug sa adlaw. Sigurado gayud. Nag-una na sa ato ang Mag-uuna.

. . . ang mag-uuna nag-una na, nahisulod na tungod kanato, si Jesus, nahimong labaw’ng sacerdote hangtud sa kahangturan sumala sa laray ni Melquisedec.

⁶²⁸ Kining halangdon nga Mag-uuna nag-una na sa ato, ug naghimo og paagi. Gikan Siya sa Espiritu, ang dakung

mga tuboran sa balangaw sa Dios, Nga walay sinugdanan o katapusan. Siya'y, Dios, hangtud sa kahangturan.

Mianinag kining silaw sa Kahayag. Usa kini ka silaw sa gugma, nga mao ang pinaka una, pula. Ang sunod nga kolor, mao ang asul; ang asul, pagkamatuod. Sunod, human niana misunod na ang uban pa nga mga kolor; ang pito ka hingpit nga mga kolor, nga mao ang pito ka Espiritu sa Dios, nga migula gikan niadtong dakung Tuboran o niadtong dakung Diyamante nga gihisgotan ni Jesus. Gitapyasan kadtong dakung Diyamante, aron mareplektar kini nga mga kolor. Ang Dios nahimong unod ug nagpuyo ipon kanato, aron nga Iyang mareplektar ang Iyang pagkamaayo ug kalooy sa taliwala nato, pinaagi'g mga gasa ug mga ilhanan ug mga katingalahan. Kadtong dakung tibuo nga balangaw nahimong usa ka Theophany, nga, nahimong sama sa dagway sa tawo, apan dili pa Siya usa ka tawo, tungod wala pa man Siya'y unod, usa pa Siya ka Theophany.

⁶²⁹ Miingon si Moises, “Buot ko nga makita Ikaw.” Gipatago siya sa Dios didto sa bato.

⁶³⁰ Ug sa paglabay Niya, nakatalikod Siya. Ingon si Moises, “Mora kadto og likod sa usa ka tawo.”

⁶³¹ Pagkahuman unsa ma'y nahitabo? Usa niadto ka adlaw didto, sa dihang atua si Abraham sulod sa iyang balongbalong. Hisgotan nato kini, unyang gabii. Sa dihang atua si Abraham sulod sa iyang balongbalong, miduaw ang Dios ngadto kaniya, diha sa lawas nga unod.

“Oh,” moingon mo, “Igsoong Branham, siya'y. . .”

⁶³² Mahibaloan nato dinhi nga gisugat Niya si Abraham sa wala pa kadto, sumala sa laray ni Melquisedec, ingon nga usa ka lawas nga unod, nga mao ang Dios. Oo, mao gayud. Siya ang Dios diha sa unod.

⁶³³ Moingon mo, “Kung ingon-ana, Igsoong Branham, nganong gikinahanglan pa man Niyang mobalik ug maipanganak?”

⁶³⁴ Wala pa man Siya naipanganak niadtong panahona. Igo lang man Siya nga gilalang, ingon nga usa ka lawas nga Iyang gipuy-an. Si Melquisedec mao ang Hari sa Salem, mao ang Hari sa Jerusalem, nga Hari sa pakigdait; nga walay amahan ni inahan, og sinugdanan sa mga adlaw o katapusan man sa kinabuhi.

Si Jesus parehong adunay amahan ug inahan, ug sinugdanan sa mga adlaw ug katapusan sa kinabuhi. Apan Siya gibuhat man “sumala sa laray” ni Melquisedec, nga walay sinugdanan sa mga adlaw o katapusan man sa kinabuhi.

⁶³⁵ Si Melquisedec mao man ang Dios Mismo. Si Melquisedec mao si Jehovah nga Dios, ang Mao ra mismo nga misugat kang Abraham, pila ka tuig human niadto, sa atubangan sa iyang balongbalong. Nakatalikod Siya sa iyaha; ingon Siya, “Nganong mikatawa man si Sarah?” Tinuod kana. Siya Mao kadtong atua

didto, nga galantaw ngadto sa Sodoma. Naila Siya ni Abraham, tungod kay sulod sa iyang tabil aduna ma'y usa ka angkla nga nagakupot niadtong saad. Dili tungod nga aduna siya'y kung unsa man nga sensasyon, kondili nagsaad gyud sa iyaha ang Dios. Ug sa dihang natagbo na niya kadtong dakung magnet, naila gyud niya nga atua Kini niadtong unod.

⁶³⁶ Migawas didto kauban si Abraham, sa makadiyut. Iyang gisultihan si Abraham. Miingon, “Ingon nga hingsayran Ko, malilong Ko ba kining mga butanga kang Abraham, ingon nga nakita Ko nga siya ang manununod sa kalibutan? Dili Ko gayud mahimo kana.” Busa, “Abraham, sultihan Ko ikaw kung unsa ang pagabuhaton Ko,” hisgotan pa nato kini unyang gabii, “didto sa Sodoma,” ug kung unsa ang pagabuhaton nila kaniadto. Ug sa diha nga gipanalanginan Niya si Abraham, mibalik na Siya pag-usab ngadto sa kawanangan. Usa ka Tawo nga atua didto ug nalukop og abog ang Iyang bisti, usa ka Tawo. Ug dili lamang kana, kondili mikaon sàb Siya og karne sa usa ka nating baka nga giuhaw ni Abraham, ug miinom og gatas gikan sa baka, ug mikaon og pipila ka tinapay (pipila ka tinapay nga ginama sa mais), nga may mantekilya. Eksakto gayud. Ug pagkahuman mibalik na usab sa pagka-Theophany.

⁶³⁷ Unsa man kadto? Nganong wala man Niya nasinati ang ikot kaniadto? Tungod wala pa man Siya natawo nga sama kaninyo ug kanako. Mao nga gikinahanglan sà Niya nga matawo sa unod, aron nga Iyang mahawiran na ang ikot. Usa kadto ka gilalang nga lawas. Usa kadto ka lawas nga ginama Niya sa calcium ug potash nga gikan sa yuta, ug nag, “Whew,” ug misulod niadto. Mao sàb gihapon si Melquisedec. Misulod Siya kaniya, usa ka lawas aron nga makalakaw Siya didto sa atubangan ni Abraham samtang napailalum sa tabil, sa usa ka tabil nga Iya Mismong gilalang; dili usa ka tabil nga iya sa paglalang pinaagi sa usa ka babaye, pinaagi sa tagoangkan sa babaye, pinaagi sa usa—usa ka selula, dili gayud. Kondili gilalang Niya kini ug misulod mismo niini, ug nakig-istorya, sumala sa laray ni Melquisedec.

⁶³⁸ Kinsa man kining Si Melquisedec?

Kay kini si Melquisedec, hari sa Salem, (nga mao ang Jerusalem), principe sa Dios nga labing hataas, (mao gayud), nga misugat kang Abraham nga nagapauli gikan sa pagpamatay sa mga hari, ug nanalangin kaniya;

Kang kinsa usab si Abraham mihatag sa ikapulo sa tanan; sanglit una sa tanan kung hubaron Hari sa pagkamatarung, (kadtong dakung gugma, kadtong gamhanang Espiritu sa sinugdan)... Hari sa pagkamatarung... unya... Hari sa Salem, nga sa ato pa, ang Hari sa pakigdait;

*Walay amahan, walay inahan, walay kagikanan,
walay sinugdan sa mga adlaw, o katapusan sa
kinabuhi; . . .*

639 Si kinsa man kadto? Wala Siya gipanganak, og dili gayud Siya mamatay. Si kinsa man gyud kadto? Ang Dios kadto, oo, mao gayud, nga nagahulagway nang daan kang Ginoong Jesus. Sigurado gayud. Apan kinahanglan Niyang moabot pinaagi sa usa ka babaye, sama kaninyo usab nga miabot pinaagi sa usa ka babaye. Ug kinahanglan Niyang moabot sa paagi nga miabot kamo, aron nga ipahibalik kamo ngadto Kaniya. Alleluyah!

Makahibulongang grasya! pagkatam-is nga tingog,

Nga nagluwas sa usa ka kabus, buta og alaut nga sama kanako!

Ako kaniadto nahisalaag, apan karon ako hingkaplagnan, pinaagi sa Iyang grasya,

Ako kaniadto buta, apan karon makakita na ako.

640 Nasabtan ko na kung unsa ang kinahanglan Niyang buhaton kaniadto. Ang Dios nahimong ako, aron nga ako pinaagi sa grasya mahimong Siya. Giangkong Niya ang akong mga sala, aron nga pinaagi sa Iyang pagkamatarung magkaaduna ako og Kinabuhiing Walay Katapusan. Dili ko mahimo nga ako mopili sa akong kaugalingon. Ang akong kinaiyahan usa man ka makasasala. Wala gyud ko'y kahilambigitan niini. Ako'y "natawo sa kalibutan, giuol diha sa kadautan, mianhi sa kalibutan nga nagapanulti'g bakak." Wala gani ni usa ka kahigayonan, man lang; wala gayud, ni wala gani og pagtinguha.

641 Sultihi n'yo ang usa ka baboy nga siya'y "sayup, tungod sa pagkaon niya og lawog," mahimo ba? Tan-awon ta kung maminaw ba kaha siya sa inyo. Sultihi n'yo ang uwak nga siya'y "sayup, tungod sa pagkaon niya og patay nga lawas," ug tan-awon ta kung unsa kaha'y isulti niya sa inyo. Kung makasulti pa siya basin unya'g moingon, "Ayaw panghilabot sa uban." Sigurado gyud.

642 Oh, apan ang grasya gyud sa Dios ang nag-usab niini nga kinaiyahan, ug gihatagan ako og kahigayonan nga magtinguha ug mangandoy ug mauhaw, "Ang Imong mahigugmaong-kalolot labi pang maayo kay sa kinabuhi, Oh Dios. Ang akong kasingkasing nagapangandoy Kanimo."

643 Miingon si David, "Ingon nga ang lagsaw nangandoy sa pagpangita sa tubig, mao usab ang akong kalag nangandoy sa pagpangita Kanimo, Oh Dios."

644 Gihatag sa Dios sa tawo kana nga pagkauhaw, aron simbahon Siya, aron higugmaon, og pangitaon Siya. Apan gituis kini sa tawo tungod sa tawag sa yawa, ug ang tawo nagapangibog sa mga babaye ug sa mga kalipayon ug sa mga

butang nga iya sa kalibutan, pagpaninguha nga tagbawon kana nga balaang linalang nga gipahimutang sa Dios dinha, aron unta nga higugmaon Siya. Pero ginapahimutang hinoon kini sa tawo sa mga butang nga iya sa kalibutan. Apan, igsoon, pag nausab na ang tawo, ug kanang tuboran nga adunay mga waya-way, og tanan nang matang sa—sa pagkahugaw sa maong atabay, nga gilimpyohan na ug gihinloan na, ug ang lunsay nga Tubig sa Dios ang napahimutang na dinha, dili na gayud kana mahilabtan pa sa sala. Amen.

Oh daw sa unsa ko Siya gihigugma! Daw sa
 unsa ko Siya nga ginasimba!
 Ang akong Kinabuhi, ang Sidlak-sa-adlaw
 kanako, ang akong Tanan-Tanan!
 Ang gamhanang Magbubuhat nahimong akong
 Manluluwas,
 Ug ang tibuok kahupnganan sa Dios nagapuyo
 Kaniya.

Mikanaug gikan sa Iyang kahimayaan,
 kanunay'ng buhi nga sugilanon,
 Miabot ang akong Dios ug Manluluwas, ug
 Jesus ang Iyang Ngalan.
 Natawo sa usa ka pasungan, estranyo ngadto
 sa Iya Mismong katawohan,
 Ang Dios sa kasub-anan, luha ug pag-antus.

Oh daw sa unsa ko Siya gihigugma! Daw sa
 unsa ko Siya nga ginasimba!
 Ang akong Gininhawa, ang Sidlak-sa-adlaw
 kanako, ang akong Tanan-Tanan!

⁶⁴⁵ Oh Dios! Giunsa ba gyud Niya pagkabuhat Niini? Ngani misulay ang tawo sa pagsulat niini. Adunay nag-ingon:

Kung ang kadagatan pagapun-on man og tinta,
 Ug ang matag lindog sa yuta ang himoong
 pangsulat;
 Ang tibuok kalangitan ang himoong
 sulatanan,
 Ug ang matag tawo usab ang mamahimong
 tigsulat;
 Apan ang isulat ang gugma sa Dios nga labing-
 hataas

Daw sa unsa nga ang gamhanang Dios sa Langit nahimong unod ug giangkong ang akong mga sala!

Apan ang isulat ang gugma sa Dios nga labing-
 hataas
 Makapahubas gayud sa kadagatan;

Ni dili gani mapasigo sa sulatanan ang
 kinatibuk-an,
 Bisan pa nga pagainaton ang tibuok
 kalangitan.

⁶⁴⁶ Ug aron hatagan og sigurado nga paglaum ang mga manununod niini nga kaluwasan, nanumpa Siya sa Iyang Kaugalingon nga Iya kitang pagabanhawon sa kaulahiing mga adlaw, hatagan kita og Kinabuhing Walay Katapusan. “Ug walay tawo nga makailog kanila gikan sa Akong kamot.” Amen.

Mag-ampo kita.

⁶⁴⁷ Sad-an ba kamo tungod sa pagsalikway sa Iyang gugma? Mipahilayo ba kamo sa Iyang mapanalanginong Persona, kining Usa ka gamhanan nga nagbuhat kaninyo sa kung unsa kamo? Ug karon ania kamo, niining buntaga, niini nga punto sa inyong kinabuhi, ug ginahatagan kamo og usa ka kahigayonan. Ginatinguha n’yo bang magpadayon sa pagkinabuhi? Aduna lamang og bugtong paagi sa pagkinabuhi, kana’y toohan si Ginoong Jesus. Kamo, diha sa inyong kasingkasing, kung toohan n’yo nga Siya mao ang Anak sa Dios ug dawaton Siya ingon nga inyong Manluluwas, ug toohan nga gibanhaw Siya sa Dios alang sa pagpamatarung kaninyo, kung gusto n’yong dawaton kini sa maong basihanan, nan inyoha na kini karon.

⁶⁴⁸ Mahimo n’yo bang ipataas ang inyong kamot? Kon may usa ka kalag nga wala pa naghinulsol, og gusto nang maghinulsol niining buntaga, moingon, “Hinumdumi ako, igsoong, magwawali, samtang magaampo kita. Ako usab napakyas man. Nagpamiyembro ako sa iglesia, apan ako—nasayod ako nga ako—wala ko pa gayud naangkon kanang imong ginasulti. Wala pa ako natawo sa Espiritu, Igsoong Branham. Wala ko pa—wala ko pa gayud naangkon Kini, mao gyud. Ginatinguha ko nga iampo mo ako, nga ihatag unta Kini kanako sa Dios niining buntaga.” Panalanginan ka sa Dios, sir. Aduna pa ba’y lain? Moingon, “Dios, himoa ako kung unsa man ang gusto Mong himoon para sa ako. Ginatinguha ko nga Ikaw ang mamahimong. . . ginatinguha ko nga mamahimong sumala sa kung unsa man ang gusto Mo para sa ako. Gisalikway man nako ang Imong gugma.” Panalanginan ka sa Dios, anak.

⁶⁴⁹ Karon sa makadiyut lang.

If we with ink the ocean fill,
 And were the sky of parchment made;
 Were every stalk on earth a quill,
 And every man a scribe by trade;
 To write the love of God above
 Would drain the ocean dry;
 Or could the scroll contain the whole,
 Though stretched from sky to sky.

Oh, love of God, how rich and pure!
 How fathomless and strong!
 It shall for evermore endure,
 The saints and Angels song.

650 Minahal nga Dios, tinuod gyud nga ang magbabalak nga nagsulat niining mga pulong sama lang gayud sa daghang uban pa nga Imong mga magtotoo, nga nagapangita, nagapaningkamot nga makakaplag og mga pulong aron nga maipahayag kini. Ug sama sa nahisulat sa Biblia, “Labut pa, tungod kay ang magwawali manggialamon man, nangita siya ug naghan-ay og daghang mga pulong.” Oh, gusto gyud namong magkaaduna og pinulongan ug bokabularyo aron nga maisaysay unta namo sa mga tawo kung unsa gayud kini, apan dili man kini mahikaplagan diha sa mortal nga mga ngabil. Pero ang tibuok Eternidad, sa walay pagduhaduha makapadayag gayud niini, kung unsa nga ang Dios sa Langit mianhi sa yuta aron luwason ang mga kabus, nahisalaag, og alaut nga mga makasasala.

651 Ginaampo ko Kanimo, Amahan, nga pinaagi niining pipila ka dire-diretso nga mga pulong, o putol-putol nga mga pulong niining buntaga, sama sa akong giingon, nga ang usa ka tawo nga mikalagiw makakaplag unta og dalangpanan, makakaplag og kalinaw ug kalipay ug usa ka malig-on nga kadasig. Ug hinaut nga makaangkla unta ang ilang kalag diha nianang saad nga gipanumpa sa Dios, nga pagabanhawon Niya sila sa kaulahiing adlaw. Pipila ka mga kamot ang nanagpataas, dinhi sulod sa bilding, dinhi mismo niini nga tabernakulo. Dios, ihatag kanila ang malig-on nga paglaum, karon mismo. Hinaut nga makaangkla sila sa Bato sa mga kapanahonan. Bisan unsa man ka kusog ang paghampak sa dagat ug ang ilang mga gagmay’ng sakayan ginakusokuso na, pero aduna gyud sila’y angkla, ang saad sa Dios. Dinha sila magapabilin, “Gisulti na Kini sa Dios. Dili Siya mahimong mamakak.”

652 “Siya nga nagapatalinghug sa Akong mga Pulong,” nga mao’y gipaningkamotan kong maiwali niining buntaga, “ug nagatoo Kaniya nga nagsugo Kanako, si Jehovah, adunay Kinabuhing walay katapusan; ug dili pagahukman sa silot, kondili miagi na gikan sa kamatayon ngadto sa Kinabuhi.”

653 Oh Bugtong Eternal, panalangini sila karon. Ug hinaut nga ang matag tawo nga ania karon nga wala pa napailalum sa Dugo, og wala pa mabag-o ang ilang kalag, hinaut nga mahitabo na kini karon, Ginoo. Ikaw man ang nagapamuhat og misteryo. Imoha kining tanan. Nahitugyan kini nganha Kanimo. Ginaampo ko nga ihatag Mo unta kini sa ilaha, ang Kinabuhing Walay Katapusan. Hinaut nga, sa umaabot nga adlaw, didto sa pikas baybayon, samtang tagsa-tagsa kami nga magalatas sa walog, hinaut nga magtagbo kami didto kon diin dili na sila “manamilit” pa.

Sa umaabot nga adlaw sa katapusan sa
 panahon mahiadto na kita sa suba,
 Sa diha nga mawala na ang ulahing
 panumduman sa kasub-anan;
 Aduna didto'y magahuhat nga mao'y
 magtultol kanato sa dalan,
 Ako dili na mag-inusara sa pagtabok sa
 Jordan.

There'll be One, Somebody waiting that'll show
 me the way,
 I won't have to cross Jordan . . .

⁶⁵⁴ Ang tanan nga nakaangkon niana nga paglaum, ipataas
 n'yo ang inyong kamot karon samtang ginahangad n'yo ang
 inyong ulo.

I won't have . . .

Karon simbahan gyud nato Siya. Tapos na ang mensahe.
 Wala ba mo malipay? Nanumpa ang Dios nga dili Niya . . .
 nanumpa ang Dios nga Iya kamong tagboon didto.

Jesus died all my sins to atone;
 When the darkness I . . . (Unsa ma'y masulti
 ninyo? Wala na ang ikot.) He will be waiting
 for me,
 I won't have to cross Jordan alone.

Oftentimes I'm forsaken, and weary . . .

Simbaha lang ninyo Siya karon.

. . . seems that my friends have all gone;

Midangat na ba kamo sa ingon-ana nga punto?

But there's one thought that cheers me . . .
 (Unsa man ang saad?) . . . makes my heart
 glad,

I won't have to cross Jordan . . .

⁶⁵⁵ Karon, mga anak sa saad, simbaha gyud ninyo Siya tungod
 sa pagbuhat niana.

I won't have to cross Jordan alone,
 Jesus died all my sins to atone;

Unsa na ma'y mahitabo?

When the darkness I see, He will be waiting for
 me,
 I won't have to cross Jordan alone.

Pagmoadto na ako sa suba . . .

Ang matag usa kaninyo mahiadto man usab. Aduna didto'y
 daku, og mangitngit nga landong nga napahimutang sa inyong
 atubangan. Usa kana ka dakung pultahan. Mosulod kamo
 didto, usa sa niining mga adlaw, tingali'g sa dili pa matapos

kini nga adlaw, tingali'g sa dili pa matapos ang panimbahan niining buntaga. Mosulod kamo didto. Sa matag pitik sa inyong kasingkasing, nagakahaduol kamo didto.

Apan pagmakita ko na ang kangitngit, didto
atua Siya nagahulat,

Miingon Siya nga maghulat Siya. Nanumpa Siya nga maghulat Siya.

Then I won't have to cross Jordan alone.

⁶⁵⁶ Oh Mapanalanginong Ginoo, puno gayud ang among mga kasingkasing, karong buntaga, hangtud nga nagaawas-awas na.

⁶⁵⁷ Ang hunahunaon nga pag mohunong na ang pulso, ug ginaplastar na sa nars ang unlan diha sa imong ulo. Ug ang imong mga kamot, dili na nimo mahimong ilihok pa. Ang imong mga kamot nahimo nang mora'g yelo. Ang imong mga anak, ang imong inahan, ang imong mga minahal sa kinabuhi nanaghilak na ug nanagdanguyngoy. Maabli na kanang dakung pultahan, didto. Nagahulat na Siya.

⁶⁵⁸ Miingon si David, “Kung sa sheol pagabuhaton ko ang akong higdaanan, didto atua Siya.” Dili na ako mag-inusara sa pagtabok niini. Sa diha nga hinay-hinay nang masablig sa atong nawong ang pisik-pisik sa suba, nan kuhaon sa Dios ang sakayang-igluluwas, og magatultol kanato sa pagtabok didto. Nagsaad man Siya nga buhaton Niya kana. Ngani miingon ang propetang si David, “Oo, bisan magalakaw ako latas sa walog sa landong sa kamatayon, ako walay kahadlok sa bisan unsa nga dautan. Ikaw nagauban kanako. Ang Imong baras ug ang Imong sungkod, kini nagapalig-on kanako.”

⁶⁵⁹ Ginoo, malipayon kaayo kami karon, nga nahiapil kami ingon nga manunonod sa saad. Karon ania na kanamo sa among kinasuloran ang Kinabuhing Walay Katapusan, tungod kay gihigugma man namo si Ginoong Jesus ug mitoo Kaniya, ug gidawat ang Iyang Pulong ug ang Iyang pagtudlo. Ug mao nga gihatag Niya kanamo, ingon nga selyo sa among pagtoo, ang Balaang Espiritu, ang selyo sa Balaang Espiritu. Ang among pagtoo nga ania sa kinasuloran namo nakaangkla na gayud. Ug bisan sa makadaghang higayon kami nagalakaw latas sa mangitngit nga mga landong, sa makadaghang higayon kami nagakapangdol sa dalanon, apan sa gihapon nagakupot gyud ang among angkla. Adunay sa kung unsang butang niini, didto, nga daw sa padayon nga nagatultol, nagaingon, “Padayon. Managpadayon kita.”

⁶⁶⁰ Dios, panalangini kami. Gikinahanglan Ikaw namo. Ipapabilin kami nga maunongon ug matinud-anon hangtud sa higayon nga moabot Ka na para kanamo, magadayeg kami Kanimo hangtud sa walay katapusan nga mga kapanahonan. Ug nianang adlaw pag anaa na kami sa yuta...ang Iyang balaang mga tiil wala pa sukad nakatunob sa yuta. Didto

atua Siya magatindog, sa kahanginan; ug ang mga balaan ug mga tinubos gikan sa tanang mga kapanahonan, sa matag pagtukaw, una, ikaduha, ikatulo, ikaupat, ikalima, ikaunom, ug ikapito, ang tanan magatindog didto nga nabistihan sa Iyang pagkamatarung; pagapurong-purongan namo Siya ingon nga Hari sa mga hari ug Ginoo sa mga ginoo, ug magaaawit niadtong mga estorya sa katubsanan. Mangurog gayud ang among mahuyang nga mga kasingkasing samtang kami magatan-aw Kaniya Nga naghigugma kanamo ug nagtugyan sa Iyang Kaugalingon alang kanamo. Bisan pa kaniadtong dili kami hiligugmaon ug mga makasasala pa, namatay si Cristo aron kami maluwas. Ginapasalamatan Ikaw namo tungod niana, Amahan, sa Ngalan ni Cristo. Amen.

⁶⁶¹ Gihigugma n'yo ba Siya? Oh, tinuod gayud Siya. Dili ba ninyo mabati nga daw sa gusto gyud ninyong hangopon Siya? Dili ba gusto gyud ninyong moduol ug hikapon ang Iyang mga tiil, dili ba?

⁶⁶² Abi ninyo, aduna kaniado og pipila ka mga tawo nga nagatambong sa akong mga buluhaton didto sa Phoenix, Arizona, nga nagaingon, “Gusto kong istoryahon Siya bahin niini. Gusto kong isulti, ‘Ginoo, gihigugma Mo ako kaniadtong nahimong mangitngit kaayo ang akong dalanon.’” Gusto ko gayud nga istoryahon Siya bahin niini sa dili pa kami motabok didto. Ako—ginatinguha ko nga makita Siya. Ako—ako—gusto ko gayud nga makita Siya. Pero ang hunahunaon kung unsa kaha ang akong bation, mangurog gyud tingali ang mahuyang kong kasingkasing pagmakita ko na Siya nga nagatindog didto.

⁶⁶³ Kanunay kong gihunahuna, “Nadungog ko unta kanang Tingog nga nagaingon, ‘Umari Kanako, kamong tanan nga nabudlayan ug nabug-atan. Papahulayon Ko kamo.’”

⁶⁶⁴ Tingali’g dili ko na madungog kana sa literal nga pagkasulti Niya niana kaniado, apan gusto kong madungog Siya nga moingon, “Mao na kini ang kaulahiing adlaw. Maayong pagkabuhat, Akong maayo ug kasaligan nga ulipon, karon sumulod ka sa kalipayan sa Ginoo, nga dugay nang giandam para kanimo.” Sukad pa kanus-a?

⁶⁶⁵ “Sukad ba niadtong naluwas ka?” Dili, igsoon.

⁶⁶⁶ “Sukad pa sa pagkatukod sa kalibutan, kaniadtong nakita Ko ikaw ug giila ka nang daan, ug gikatagana ka na ngadto sa Kinabuhing Walay Katapusan,” bulahan ka na diay kaniado pa. “Ang tanan nga Iyang mga giila-nang-daan, Iyang gitawag.” Husto ba? “Ang tanan nga Iyang mga gitawag, Iyang gimatarung. Kadtong Iyang mga gimatarung, Iya nang gihimaya.” Mao kana. Iya kitang giila-nang-daan, gitawag kita, gimatarung kita, ug gihimaya na kita kauban Niya, sa katapusan sa kalibutan, paingon sa atong ganti. Wala ba mo malipay? Sigurado, higugmaon gyud ninyo Siya tungod niana. Sa higayon

nga dili ninyo matabangan ang inyong kaugalingon, ug ania Siya nga miabot ug gibuhat kana alang kaninyo.

⁶⁶⁷ *Blest Be The Tie That Binds*, Igsoong babayeng Gertie. “Ang atong mga kasingkasing diha sa Cristohanong gugma,” samtang nagapahigayon kita dinhi karon niining diyutay’ng fellowship sa pagsimba, pagkahuman mag-ampo kita alang sa mga may sakit. Panalanginan kamo sa Dios. Kaninyo nga mga nagpataas sa inyong mga kamot ngadto kang Cristo niining buntaga, pangita mo og dapit nga masimbahan, alagari ninyo Siya.

⁶⁶⁸ Bueno, simbahon nato Siya karon, ingon nga usa ka kongregasyon, tana kamong mga Methodist, church of God, Assemblies of God, mga Presbyterian, mga Lutheran, Katoliko. Karon dungan ang tanan, mag-awit kita karon.

Blest be the tie that binds
Our hearts in Christian love;
The fellowship of kindred mind
Is like to that Above.

Before our Father’s Throne,
We pour our ardent prayer;
Our fears, our hope, our aims are one,
Our comfort and our care.

When we asunder part,
It gives us inward pain;
we shall still be joined in . . . (Pila ba dinhi ang
mga Methodist, mga Baptist, ug tanan na?)
And hope to meet again.

⁶⁶⁹ Dili ba may nahimo kana nga maayo kaninyo? Motuyok kita ug makiglamano sa usa’g usa karon, samtang ato kining awiton pag-usab.

Before . . .

Makiglamano, sa kang kinsa man nga anaa sa inyong luyo, sa inyong atubangan, og sa isig ka kilid.

. . . Throne,
We pour our ardent prayer;
Our comforts and our care.

Now when we asunder part,

Gihigugma nato ang usa’g usa.

It gives . . .

Gusto n’yo unta nga magpadayon pa ang panerbisyo? Kita n’yo? Mao bitaw kana ang atong ginahunahuna.

. . . inward pain;
But we shall still be joined in heart, (ingon nga
usa ra)
And hope to meet again.

Kung dili man dinhi, nan sa nianang mahimayaong Adlaw kita magtagbo.

⁶⁷⁰ Karon, Amahan, dawata ang among pagsimba karong buntaga. Kuhaa ang Pulong ug itanum Kini sa kasingkasing sa mga magtotoo. Hinaut nga dili na sila mag-usab-usab, nga dasig karon ug pagkaugma luya na sab, kondili hinaut nga makaplagan niini nga mga Pulong ang ilang dapit nga pahulayanan diha sa kasingkasing sa matag magtotoo. Ang mahibaloan kini, nga, “Ang Dios nanumpa og usa ka saad, ug adunay duha ka butang nga walay-pagkausab. Ang pagkadili-mabalhinon sa Dios, ingon nga, imposibli gayud nga mamakak Siya, aron ang mga manununod niini nga kaluwasan magkaaduna og malig-on nga paglaum, malig-on ug sigurado, usa ka angkla sa kalag.” Ang mahibaloan kini, nga “Ang Dios nagsaad kanamo, pinaagi sa pagpanumpa. Una, dili Niya mahimong mamakak; ang usa pa, Siya nanumpa og usa ka saad gawas niana, nga pagabanhawon Niya kami sa kaulahiing adlaw ug hatagan kami og Kinabuhing Walay Katapusan.” Nahibaloan pud, nga, “Pagkahuman nga kami gitawag, miingon Siya nga naila na Niya kami sa wala pa ang pagkatukod sa kalibutan, ug gipili na kaming daan ngadto sa pagkasinagop ingon nga mga anak pinaagi ni Jesus Cristo. Ug Iya kaming giila-nang-daan. Gitawag Niya kami. Ug sa dihang gitawag Niya kami, gimatarung Niya kami.” Dili man namo mapamatarung ang among mga kaugalingon, busa gimatarung Niya kami pinaagi sa kamatayon sa Kaugalingon Niyang Anak. “Kadtong Iyang mga gimatarung, Iya nang gihimaya.” Nasulti na ang Pulong. Ug anaa na kami sa among dalan, nga nagapaingon, nagakalipay sa pagpaingon ngadto sa Himaya.

⁶⁷¹ Hatagi og pagtoo ang mga tawo, ug hinaut nga ang diyutay’ng dautang mga gawi ug mga ingon-anang butang nga anaa pa sa mga tawo, hinaut nga mangbuhi na sila niana, niining buntaga, pinaagi niining Pulong sa Dios nga mao ang angkla sa kalag, malig-on ug sigurado. Hinaut nga mangbuhi na sila sa ilang mga dautang gawi, sa diyutay’ng mga kainit sa ilang ulo. Ug sa mga butang nga dugay nang. . . Sama sa giingon ni Pablo, diha sa sunod nga bahin sa mensahe sulod sa pila ka adlaw, “Isalikway tà ang tanang kabug-at, ug ang sala nga sa dakung kasayon nagapiit paglikos kanato, aron nga mahimo natong dalaganon nga mapailubon ang lumba nga gitanyag sa atong atubangan; nga magatutok sa magbubuhat ug maghihingpit sa atong pagtoo, si Jesus Cristo, Nga gitintal sa tanang mga paagi sama kanato, apan wala nakasala.” Gitugotan Siya nga tintalon kaniadto, apan wala Siya nagpadala sa tentasyon. Ug ginatintal man pud kami, apan wala gyud nagpadala. Tungod kay ang Kinabuhing nga ania sa kinasuloran namo mao man ang angkla sa among Eternal nga kapaingnan, ug ginakuptan gayud namo kana ingon nga sagrado sa among kasingkasing.

672 Karon, daghan ang mga gipaantus ni Satanas tungod sa mga balatian. Andam na kami nga mag-ampo para kanila, Amahan. Hinaut nga sila, samtang magaaagi sila ilalum sa Pulong sa Dios niining adlawa. . . Ang bililhon nga Pulong nga gikawali, ang Biblia nagapamatuod, ang mga Manulonda sa Dios nagatindog sa haduol, ug ang gamhanang Balaang Espiritu, labaw sa tanan, nagatindog gayud dinhi aron magpamatuod sa Pulong. Karon, Amahan, samtang magaaagi sila ilalum sa Pulong sa saad, niining buntaga, hinaut nga managpanguli sila gikan dinhi nga mamaayo na. Aron nga tangtangan na nila ang aparat nga pangsuporta nila, aron biyaan na nila ang mga wheel chair ug—ug mga higdaanan nga ilang gihigdaan, ug mamaayo na. Itugot kini, Ginoo. Hinaut nga mamalik sila sa mosunod nga panerbisyo nga gikatugot nga makatambong sila, o kaha sa ila mismong mga panimbahon, nga nagakalipay, og ginapasundayag ang mga gamhanang butang nga gibuhat ni Cristo. Amo kining ginabuhat alang sa Imong kahimayaan, sa Ngalan ni Jesus. Amen.

673 Mangayo ako og pasaylo tungod sa akong gisaad, nga karong buntaga hisgotan na unta nato ang ika-7 nga kapitulo, pero wala na man og makadangat dinha. Ug kinahanglan pa man gud natong mogahin og diyutay'ng panahon para—para niining, linya sa pagpaampo. Ug bueno, unyang gabii, kon itugot sa Ginoo, hisgotan na nato ang ika-7 nga kapitulo, ug hibaloong kung Kinsa kining si Melquisedec. Pila man ang gustong makahibalo? Oh, paingon na kita sa paghisgot Kaniya, og hibaloong kung si Kinsa ba gayud Siya. Ug nagasulti man ang Kasulatan kung Kinsa Siya. Kita n'yo?

674 Ug ang ingon ni Scofield usa kono kadto ka “pagkasacerdote.” Unsaon man pagkahimong usa ka pagka-sacerdote kadto, nga wala man gani og sinugdan o katapusan man? Nakita n'yo, dili kadto usa ka pagka-sacerdote. Usa kadto ka Lalaki, Melquisedec (ang Ngalan), usa ka Tawo.

675 Dili, ingon nga walay-pagtahud, pero ginaingon man gud sa Christian Science nga ang Espiritu Santo kono “usa ka hunahuna.” Nga ang Biblia nag-ingon man nga, “Siya, ang Espiritu Santo.” Ug ang *Siya* usa ka puli-ngalan. Usa Kini ka Persona; dili nga usa ka hunahuna. Usa ka Person. Walay pagduhaduha.

676 Ug si Melquisedec usa ka Tawo, usa ka Tawo Nga walay sinugdanan sa mga adlaw o katapusan sa mga katuigan. Wala Siya'y amahan ni inahan, o kagikanan man. Ug mahibaloan nato kung si Kinsa Siya, kon itugot sa Ginoo, unyang gabii, pinaagi sa Pulong. Gusto n'yo ba Kini? Oh! “Ang Imong Pulong mao'y lamparahan sa akong alagianan ug sa akong mga tiil.” Oh!

677 Karon, moingon mo, “Igsoong Branham, wala gayud nako masabti Kini.” Ako man usab.

678 Apan, usa ka higayon, niadtong nagwali ako didto sa Kentucky. Ug may pipila ka mga bag-ohan, ug mga Katoliko ug uban pa, nga mahimong wala nakasabot niining halawom, og madagayaon nga mga butang sa Kasulatan. Nagawali ko niadto mahitungod sa Balaanog pagpang-ayo. May usa ka luoy'ng nakatiniil nga babaye ang nagdala . . . wala pa siya'y kinse anyos ang panuigon, may dala nga usa ka gamay'ng bata, ug ginaatake kini og palsy. Ingon ko, "Unsa ma'y problema, sa imong bata, igsoon?"

679 Miingon, "Nagakurogkurog siya." Wala man siya kahibalo kung unsaon pagsulti nga, palsy kadto. Wala pud siya kabalo kung unsay tawag niadto.

680 Ang maong luoy'ng babaye tingali'g wala pa gyud sukad nakasul-ob og sapatos, sa tibuok niyang kinabuhi. Pero may lalaki nga nagapalangga kaniya, og nakadunghay ang iyang hataas nga buhok. Ingon ko, "Nagatoo ka ba?"

681 Ug mitan-aw sa ako kadtong gagmay'ng, abohon nga mga bata. Ingon siya, "Oo, sir. Nagatoo gayud ako."

682 Gikuha ko ang gamay'ng bata. Ug samtang nagaampo ako para niadtong bata, mihunong kadto sa pagkurogkurog. Uh-huh. Ug nawala na kadto, nawala na.

683 Pagkasunod adlaw, nagapangayam ako og squirrel, didto sa kilid sa bukid. Nadungog ko ang pipila ka lalaki nga atua didto nga nag-istoryahanay, samtang nagahagonghong ang gabas. Ug kadyut akong miadto didto. Gikan na man kong nangayam og squirrel. Nag-istoryahanay sila mahitungod nako, samtang nagalingkod didto, nga nagamama og tabako ug ginaluwa kadto, og nagkatag didto ang mga dahon sa tabako, nga ingon *niana*. Ug nag-istoryahanay sila, kaniadto, mahitungod sa panagtigum sa miaging gabii niadto. Miingon ang usa kanila, "Nakita ko kadtong bata. Miagi man ko didto, kaganinang buntag. Wala na baya nagkurogkurog, kaganinang buntag." Kita n'yo? Ingon pa, "Tinuod gyud kadto." Ug nagapangluwa ang maong lalaki.

684 Ug aduna sila'y mga riple nga nakasandig sa may punoan, busa nahunahuna ko nga mas maayo kon magpakita na ko. Kabalo mo, aduna man gud sila'y mga panagbingkil didtong, dapita. Ug, miduol ako. Ingon ko, "Maayong buntag, mga igsoon."

685 Kadtong dakung lalaki, mora'g siya kadtong nag-istorya, nagamama siya og tabako sa iyang baba, nga nakaingon *niana*, sa may kilid sa baba nga nakaingon *niana*, ug dakuon, og taas ang liog. Ug nagasul-ob siya og dakung karaan nga kalo, nga medyo nakatabon sa iyang nawong. Mitan-aw siya sa palibot ug nakita ako. Gihubo niya dayon ang kalo, gibutang kadto, og dunay *gitulon*, gitulon niya kadtong gimama nga tabako, og miingon, "Maayong buntag, parson." Kita n'yo? Oo, sir.

Pagtahud. Ug husto kana. Kung giunsa niya pagkalingkawas niadtong gitulon niya, wala ko kabalo, pero nakalingkawas siya.

686 Ug, pagkasunod gabii niadto, sa pagbalik ko, dunay usa ka lalaki didto nga medyo gustong makiglantugi sa ako. Nagatambong siya sa usa ka iglesia nga dili nagatoo sa Balaanong pagpang-ayo. Ug, iglesiang Methodist kini, sa White Hill, Kentucky. Busa miadto siya—siya ngadto. . . Nagatindog siya sa gawas. Duna siya’y bitbit nga lampara diha sa iyang kamot. Ug ingon siya, “Aduna ko’y gustong isulti, magwawali. Dili ko gayud madawat Kana, tungod kay dili ko makita Kini.”

687 Ingon ko, “Dili mo Kini makita?”

688 Ingon siya, “Dili.” Miingon, “Masakiton man ako, usab. Pero,” miingon, “Dili ko gyud Kini makita.”

Ingon ko, “Asa man ka nagapuyo?”

Ingon siya, “Didto dapit sa Big Renox.”

Ingon ko, “Bueno, unsaon man nimo pag-uli?”

Ingon siya, “Bueno, maglakaw ra ko pauli.”

Ingon ko, “Makita ra diay nimo ang imong balay?”

Ingon siya, “Dili, sir.”

Ingon ko, “Ngitngit na man kaayo karon, dag-um pa gyud.”

Ingon siya, “Bitaw.”

Ingon ko, “Nan unsaon mo man pag-uli?”

Ingon siya, “Gamit kini nga lampara.”

Ingon ko, “Ang lampara dili man kana magadan-ag sa tibuok dalan hangtud ngadto sa imong balay.” Ingon ko, “Unsaon mo man paglakaw?”

Ingon siya, “Oh, maglakaw ako nga bitbit ang lampara.”

689 Ingon ko, “Ingon niana. Aduna ka na karon og kahayag sa lampara, ug sa matag higayon nga motikang ka sa *niini* nga direksyon, padayon ra nga magadan-ag ang kahayag sa imong ginalaktan. Kung padayon ka lang sa paglakaw, nan padayon ra sàb nga mag-uban kanimo ang kahayag.”

690 Ug buhata n’yo kana niining buntaga, tinguhaa n’yo si Cristo, ang gamhanang Labaw’ng Sacerdote, ang Tigpangaliya alang sa inyong sakit, o sa inyong mga balatian, o sa inyong kalag. Tingali’g wala ninyo masabti Kini. Kami man usab. Apan gimandoan man kita nga “Maglakaw diha sa Kahayag maingon nga Siya anaa sa Kahayag.” Nagatikang ka pasulod sa maong Kahayag. Ug kon kauban ninyo ang Kahayag, magadan-ag ang maong Kahayag hangtud sa hingpit nga adlaw. Padayon Kini nga magadan-ag sa dalanon nga inyong ginalaktan.

Ug magalakaw kita niining maanindot og
 karaan nga dalan,
 Nagapamahayag bisan asa man ako moadto,
 Nga mas tinguhaon ko pa nga mamahimong
 usa ka kinaraan nga Cristohanon, Ginoo,
 Kaysa unsa mang butang nga nahibaloan ko.

Nadungog n'yo na ba kanang karaan nga awit?

Wala gayu'y unsa man nga sama sa usa ka
 kinaraan nga Cristohanon,
 Cristohanong gugma ang ginapasundayag;
 Nagalakaw kita sa maanindot og karaan nga
 dalan,
 Ug nagapamahayag bisan asa man kita
 moadto,
 Nga mas tinguhaon ko pa nga mamahimong
 usa ka kinaraan nga Cristohanon, Ginoo,
 Kaysa unsa mang butang nga nahibaloan ko.

⁶⁹¹ Gusto ko gayud kini. Sige. Karon mag-ampo na kita para sa mga may sakit. Dili nato . . . Wala kita nagaangkon nga mahimo natong ayohon ang mga may sakit. Kung ginaangkon man nato, nan sayup gyud nga butang ang atong ginasulti. Tungod ang matag masakiton nga tawo nga ania karon naayo na man. Mao kana ang giingon sa Kasulatan. "Tungod sa Iyang mga labod kita nangaayo." Husto ba kana?

⁶⁹² Ang matag makasasala nga ania karon, kung aduna pa ma'y usa, naluwas ka na sukad pa niadtong namatay si Jesus. Apan dili unta kamo matatay dinhi nga gisalikway ra ang kahigayonan nga gipahimutang na sa inyong atubangan, nga mosulod sa Iyang Presensiya ug dawaton Kini. Gihanyag na Kini karon. Mao nga karon na mismo kinahanglan n'yong dawaton Kini. Kung lagpasan ra ninyo ang Dugo, kung ingon niana kamo wala na'y lain kondili . . . Hinukman na kamo, tungod kay ginahukman kamo sa paagi kon giunsa n'yo pagtagad ang Pangbayad-sa-sala nga iya ni Ginoong Jesus Cristo. Kita n'yo? Inyong . . . ikaw ang nagahukom sa imong kaugalingon mismo.

⁶⁹³ "Busa Siya gisamaran tungod sa atong mga kalapasan, ug tungod sa Iyang mga labod kita nangaayo." Busa, wala gyud ko'y bisan unsa man, para ayohon kamo. Walay bisan unsa man ang iglesia, para ayohon kamo. Kondili ang bugtong butang nga among maiampo mao kini, nga dili unta mapakyas ang inyong pagtoo, og moduol unta kamo sa altar niining buntaga aron dawaton si Cristo ingon nga inyong Mananambal, maingon nga gidawat ninyo Siya ingon nga inyong Manluluwas. Ug walay unsa man . . . Ang Dios nagapamuhat og mga milagro. Nagapakita Siya og dagkung ilhanan. Ang mga buta, mga bungol, mga amang, og tanan na, nangaayo man dinhi mismo sa tabernakulo. Apan kon mahitabo man o dili, ginadawat gihapon

nato Kini, bisan pa man. Makadaghan nang higayon nga kanang mga butanga nagakahitabo pinaagi sa mga panan-awon.

⁶⁹⁴ Pila ba ang ania dinhi mga tulo ka Dominggo na ang milabay, o kaha upat, kaniadtong may lalaki nga miduol dinhi, nga buta ug paralisado na, o nagalingkod na lang sa wheel chair tungod nga wala na ang ugat nga para sa panghinimbang? Ug sa wala pa ako migikan sa balay, nakita ko na siya sa usa ka panan-awon, “Nga may usa ka lalaki dinha, itum ang buhok, nga ginauban na. Matahum nga babaye ang iyang asawa, mga saisenta anyos na ang panuigon. Moduol ang babaye ug mohilak,” ug iya akong hangyoon. “Nga mobalik ug iampo ang iyang bana.” Nagalingkod mismo siya dinha.

⁶⁹⁵ Ug miduol ako. Miingon ako sa pipila ka kaigsoonan dinhi, “Tan-awa n’yo kini.”

⁶⁹⁶ Ug sa pagnaug namo diha sa may altar, nagaampo na ang uban. Sa dihang miduol na ako aron mag-ampo, milakaw sa ako dinha ug mibalik dinhi dapit. Ug mitindog ang iyang asawa ug miduol nga ingon ka eksakto gayud sa pagkasulti sa Ginoo nga mahitabo kadto. Nanagtan-aw ang mga tawo, aron makita kung mahitabo ba kadto nga ingon niadto. Pero wala gyud kadto napakyas. Ug busa sa dihang nakalakaw na ang maong lalaki . . .

⁶⁹⁷ Nahibaloan nako, nga may usa ka tawo, si Dr. Ackerman, nga taga Birdseye, Indiana, mao diay ang nagpaanhi sa iyaha dinhi; nga usa ka Katoliko, ug ang anak niyang lalaki usa ka pari sa monasteryo didto sa Saint Meinrad. Ug si Dr. Ackerman kaubanan ko siya sa pagpangayam, ug iyang gipaani ang maong lalaki. Pero gipakita na sa Ginoo sa ako ang usa ka tawo nga itum og buhok nga mao’y magpaanhi sa iyaha, pero wala ko kabalo niadto kung kinsa kadto.

⁶⁹⁸ Ingon ko, “Si Dr. Ackerman ba kadto?”

⁶⁹⁹ Ingon siya, “Oo.” Kita n’yo? Ug dayon ang maong lalaki . . .

⁷⁰⁰ Ingon ko, “Kini’y MAO KINI ANG GINAINGON SA GINOO.” Minaug ako. Ingon ko, “Sir, tindog ka.” Buta siya ug dili . . . siya . . . Nawala na man ang—ang ugat nga para sa panghinimbang. Mao nga dili na siya makabalanse nga ingon niana. Kita n’yo? Ingon niadto ang iyang kahimtang sulod sa daghang mga katuigan, miadto na gani sa Mayos ug bisan asa na lang. Ug nag-ampo lang ko og usa ka pag-ampo para niya, ug gipatindog siya. Atua siya, nga nagalakaw na.

⁷⁰¹ Una miingon siya, “Dili ta ka makita.” Dayon misinggot siya, “Oo. Makita na ta ka.” Naabli gyud ang iyang mga mata niadtong tungora mismo, siya nga Orthodox gani, ang iyang asawa, Presbyterian.

⁷⁰² Ginahunahuna sa ubang tawo nga “Dili nagasinggit ang Presbyterian, ug ang Orthodox.” Nadungog n’yo unta sila. Oo.

Misinggit sila ug naggakus sa usa'g usa. Mibalik ug gikuha ang iyang wheel chair, ug milakaw na pagawas ug minaug sa hagdanan, nga sama sa bisan kinsa man nga tawo, makakita na ug makasulti na ug—ug ingon niana.

703 Nakadawat ko og sulat gikan sa iyaha, o tawag, niadtong miaging adlaw. Nagtoo ko, giadtoan siya ni Igoong Cox. Miingon, “Nabati kono niya nga mora'g ginatusok-tusok ang iyang mga mata.” Mao gayud. Tungod kadto sa ugat, sa mga ugat sa mata nga nagatubo na ug nabuhi na, kabalo na mo, ug naulian na. Nawagtang na ang tunglo.

704 Kung tugotan n'yo lang ang kinaiyahan sa paagi niini, kung walay magababag sa kinaiyahan, nan magkaaduna kini'y—kini'y bug-os nga pagkontrolar. Ngani kung hiktan mo ang imong bukton, mababagan niini ang sirkulasyon sa dugo, hangtud nga mamatay ang imong kamot. Bueno, tungod kay, sa natural, mamahimo kanang okey ra kung pasagdan mo lang kana. Apan aduna ma'y nanghilabot sa kinaiyahan. Busa, kung dili n'yo kini makita, nan wala pu'y paagi nga makita kini sa usa ka doktor. Tungod may duha lang man ka butang aron makapamuhat siya: kung unsa ang makita niya, og kung unsa ang mabati niya. Kana lang ang bugtong butang aron makapamuhat siya: kung unsa ang makita niya ug kung unsa ang mabati niya.

705 Kung dili niya kini makita, nan kini gayu'y espirituwal. Kung ingon-ana aduna, lamang og bugtong butang, usa ka butang ang mahimong mahitabo; ang mag-ampo kita, nga wagtangon ni Cristo ang tunglo, hinginlan ang yawa, ug hinay-hinay na kana nga mahimong normal, og maayo na. Mamaayo gayud, ug mao lang kana. “Sa Akong Ngalan pagahinginlan nila ang mga yawa.” Husto ba? Usa kini ka saad para sa iglesia. Usa kini ka saad sa gahum. Ang unsa? Kini, kining Presensiya Niya nga nagauban kanato. Karon, ang nagababag kanato sa pagkahimong hingpit karong buntaga, aron mabuhat unta ang mga butang nga sama sa Iyang gibuhat kaniadto, mao'y tungod kay ania pa man gud kita sa niining tabil. Kita n'yo? Apan aduna kita'y usa ka pagbati nga nagaingon sa ato, “Oh, oo.” Kita n'yo?

706 Ug kon dawaton n'yo ang inyong pagkaayo, bisan unsa pa'y isulti sa tabil, ang gisulti gyud sa Pulong ang matuman. Kita n'yo? Mao kana. Mao gyud. Ug ang—ang—ang Pulong sa kanunay mao man ang pinakalabaw sa bisan unsa pa man nga butang. Ang Eternal nga Pulong sa Dios!

707 Matikdi n'yo si Sarah, patay na ang iyang tagoangkan, nubenta'y anyos na ang panuigon, nagpuyo siya uban sa iyang bana niadtong mga dise-sais o dise-siete anyos pa lang siya, walay mga anak; si Abraham, usa ka gatus na ang panuigon. Pero namuhat gyud ang Dios ug gihatagan sila og bata. Kita n'yo? Tungod kay, mitoo man sila. Gitawag nila kadtong mga butang

nga wala nagalungtad, ingon nga nagalungtad. Sumulod kamo niana nga dalanon niining buntaga, higala.

⁷⁰⁸ Ug unyang gabii, ginalauman namo. . . Kung nagbisita lang kamo dinhi kanamo, malipayon kami nga makauban kamo niining buntaga. Ug ang Dios magauban kaninyo. Ug kung ania pa kamo sa lungsod hangtud unyang gabii, malipay na pud kami nga makauban kamo unyang gabii sa nahibilin nga bahin niini nga panerbisyo, mahitungod kang Melquisedec. Ug kung dili man, ug aduna kamo'y panimbahon sa inyo, tambong lang mo sa inyo mismong simbahan. Kana'y—kana'y katungdanan gyud ninyo. Kung miyembro kamo sa usa ka iglesia, tambong gyud mo didto. Kini dinhi usa lang man ka diyutay'ng tabernakulo kon diin nanagkatigum kita ug nagapakig-fellowship sa usa'g usa. Karon, panalanginan kamo sa Ginoo.

⁷⁰⁹ Ug tugtogon ni Igsoong Gertie para kanato ang, *The Great Physician Now Is Near*. Ug aduna ba'y ania dinhi nga igaampo? Ipataas ang inyong kamot, kadtong mga nagatinguha nga makaapil sa linya sa pagpaampo, aron ipahimutang ang inyong pagtoo kang Cristo. Sige. Palihog paglina lang mo dinhi *niini* nga bahin sa simbahan, kung mahimo. Ug palihog isibog na lang diyutay ang mga lingkoranan, igsoon, kung mahimo, aron nga aduna kita'y diyutay'ng espasyo dinha ug ipalinya dinha ang mga tawo. Duol mo ngari dinhi *niini* nga bahin.

⁷¹⁰ Ug mag-ampo na kita karon, samtang manag-awit kita. Ug hangyoon ko ang mga anciano dinhi, sa unsa man nga denominasyon o simbahan, bisan unsa man kana, kung nagatoo kamo sa Balaanong pagpang-ayo, mahimo ba nga motindog kamo uban kanako dinhi sa entablado, aron mag-ampo para sa mga may sakit? Malipay kami nga makauban kamo. Bisan unsa man nga denominasyon, o walay denominasyon, o unsa man kamo, malipay gyud kami nga makauban kamo. Mahimo ba nga moduol na kamo karon, alang sa pag-ampo? Duol mo ngari ug motindog uban kanako.

Igsoong Neville, palihog duol pud ngari nga dala ang lana.



MGA HEBREOHANON, KAPITULO SAIS 3 CEB57-0915M

(Hebrews, Chapter Six 3)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Septyembre 15, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org